

30

The same.

Lelong 17941

LETTRE

ADRESSEE DE ROME
A LA ROYNE, MERE DV
Roy, traduite d'Italien en Fran-
çois, contenant vtile admonition
pour pouruoir aux affaires qui
se presentent.

domine doce me facere voluntatem

Rendre parfaite soy

IEREMIE XLVII.

O toy espee du Seigneur, Iusqu'à
quand ne te reposeras-tu?

Rentre en ta gaine, appai-
se-toy, & t'accoise.

Fine aliquid

1563

Case

F

39

.326

1563.5pc

THE NEWBERRY
LIBRARY



LETTRE ADRES-
SEE A LA ROYNE. MERE DV
*Roy, traduite d'Italien en Francois con-
tenant vtile admonition pour pour-
voir aux affaires qui se
presentent.*



MADAME, depuis que n'agueres par vostre congé ie me suis retiré de vostre suite, ie n'ay voulu faillir de m'enquerir partout de ce qui touchoit à vostre honneur & reputation, pour faire mon deuoir de satisfaire à mon pouuoir aux opinions que les hommes prennent d'autrui souvent à la volée, & sans ferme fondement : & de ce qui passeroit ma capacité, ou bien qui ne seroit receu venant de ma part, vous aduertir, selon la mesure des graces que Dieu m'a données. Je passeray sans m'arrester, à ce que j'ay peu entendre par le chemin allant en poste iusques à Montcalier, m'estant là mis sur le fleuve du Pau, où ie n'ay eu le moyé de discouurir suffisamment, pour vous en faire fidele rapport. Mais tirât outre à Ferrare, Venise, & puis à Rome, & aux lieux des enuirs, ioint les bruits precedans, j'ay

trouué par toute l'Italie, es maisons des plus appa-
rés seigneurs, comme d'une voix commune,
les grans merueilles que Dieu a faites & conti-
nuées en la France: & specialemēt enuers vous,
Madame. Et recognoissent tous (ce que moy-
mesme ne puis debatre, conuaincu de la force
de verité) que il n'y a homme tant aueuglé, ou
destourné de droit iugement, qui ne ressentē en
telles œuures le doigt de Dieu, comme firēt les
magiciens de Pharaon, en ce que Dieu fit en Egy-
pte par Moysē & Aaron, en la deliurāce du peu-
ple de la captiuité d'Egypte.

Je ne puis douter, Madame, que les grans be-
nefices & dons dont Dieu a souuent vsé en vo-
stre endroit, ne vous viennent souuent en memo-
re, pour l'en louer, & luy en rendre graces. Ce
sont les sacrifices de louāges & oblations qu'il
requiert de vous, & veut luy estre rendues: &
specialemēt de ce qu'il ne s'est contenté de vous
auoir tirée comme par la main en vostre ieune
aage par la conduite & diligence du Duc d'Al-
banye vostre oncle, de vostre famille & patrie,
& de l'education de ceste Babylone, ou vous
estiez attacchee, pour vous colloquer avec les
fleurons de la France, vous conduisant par de-
grez, en peu de temps, de Duchesse d'Orleans,
en Dauphine, iusques à toucher la couronne du
plus excellēt Royaume de la Chrestienté. Mais
non sans afflictions afin que tousiours vous eus-
siez recours à luy. Car lors vous fustes trauail-
lee par les inductions & secrètes menées de ce-
luy, auquel auez depuis fait tant de faueur,
qu'il

qu'il se persuadoit d'obtenir par licence du Pape (duquel il cherchoit ce que depuis il à obtenu, d'estre sa creature rouge) de vous separer de vostre Roy & mari, soubz pretexte de sterilité. Mais ce Dieu puissant & merueilleux oururier, vous fit grace comme à Rachel, & la bõne Anna mere de Samuel femme d'Elcana, & vous ostant l'opprobre, & dissipant le conseil de ce meschant, vous fit mere de dix enfans, pour fermer la bouche de vos ennemis, & leur faire entendre que c'est luy qui fuscite du ventre de la sterile, enfans à fecondité, & qui laisse sans posterite celle qu'il auoit fait feconde. Et depuis que par son decret immuable & son iuste vouloir (dont les causes nous sont cachees) il luy à pleu vous priuer de la societé & compaignie de vostre Roy, & fils aîné, il vous à fait trouuer grace non accoustumee enuers le peuple & subiets du Roy : tellement que par le commun accord des estats de France, & sans contradiction, vous auez este eleuë, non seulement tutrice du Roy : mais gouuernante du royaume: voire vous, Madame, estant femme, & femme estrangere, contre les statuts & ordonnances des loix du pays, qui ne permettent par l'ancienne Loy Salique, aux femmes non plus gouuerner, que regner. En quoy s'est euidemment monstree en excellence l'œuvre puissante de nostre Dieu, qui tient en sa main & tourne ou il luy plaist le cœur des Roys & des peuples. Et comme il nous est besoin d'estre continuellement exercez par diuerses afflictions pour nostre sa-

lut, afin qu'ayans souffert selon la volonté de Dieu, nous en rapportions le fruit de sa promesse. Il vous a de rechef appresté vn nouveau travail par l'vn de la mesme maison qui vous auoit premierement affligée, afin que vous eussiez certitude que tout le mal & d'anger, non moins perilleux qu'apparent, du sang Royal de France, deuoit proceder de celuy qui depuis a troublé par le pernicleux conseil de son frere, tout le Royaume par guerres ciuiles: tenant par son effrenée & desmesurée ambition, le Roy, & vous, Madame, en miserable captiuité, sous faux pretexte de Religion, qui luy seruoit de masque pour couvrir ce desir desordonné qu'il auoit, d'occuper & s'appliquer le Royaume, pendant qu'il auoit ia gaigné ce point de tenir & le Roy & vous, Madame, sous sa patte cruelle. De sorte qu'estant ainsi forcée, auez consenti au malheureuses entreprises d'vn ennemi commun, perturbateur du repos public, dont sont procedées les conspirations qu'il auoit dressées contre le Prince de Condé, & ceux de son heureuse alliance & confederation, combien qu'ils n'eussent prins les armes que par vostre expres commandement, & pour vostre tuition, deffence & liberté. Mais Dieu les a tellement fortifiez, que contre vostre gré, ils n'ont voulu abandonner vostre cause & iuste defense: à quoy s'ils eussent cōsenti, c'estoit fait selon le iugement humain, du Roy, de messieurs ses freres, & de vous, avecques grāde confusion, & apparente reuolution du Royaume
en

en vne race tyrannique & bastarde: qui taschoit
à deschasser les legitimes Princes de leur estat
auquel Dieu les a constituez. Si est-ce que
par conspiration & prodicion les Preuost des
marchans & escheuins de la mutine & rebel-
le ville de Paris, y auoyent consenti, & specia-
lement le Parlement composé de gens pieça
apostez à cest effect, par ceste maison superbe.
Quels en ont esté leurs actions? Il seroit par
trop long à reciter, mesmement quand les plus
apparens d'iceluy tenoyent le conseil priué à Pa-
ris: la Cour absente, chez le chef de la coniura-
tion, & consultoyent la prinse du Roy, & de
vous, & les desseins de ceste guerre ciuile, & de
transmuer la couronne du Royaume ailleurs,
pour fausses causes de insuffisance, de faute de
santé, de bon & droit iugement pour la con-
duitte du Royaume. Et proposoyent certains
seditieux exemples dont c'est insensé & tumul-
tueux de Thou, se sauoit aider: & pour tels
notables exploits, vaincue par la poursuite de
ses autheurs, vous l'auiez esleué en degré d'hon-
neur de premier president dudit Parlemēt, bien
que sachiez qu'il a serui de flammèches, & d'a-
uoir incité le conspirateur à ceste guerre ciui-
le, & qu'aux tumultes de Paris, il a luy-mes-
me porté les armes, induit les habitans à com-
motion populaire, au sac & pillage des sub-
iets du Roy. En quoy faisant, Madame, vous-
auez par trop dissimulé à ses fautes, qui ne
vous pouoyent estre cachees, si vous vous
en fussiez enquisse, & pource que le precedant

vous instruïsoit de l'aduenir, en introduisant vn meschant, vne corruption, & vne peste publique, en lieu & degré d'honneur, vous auez aussi fait ouuerture aux fautes qu'il commetra ci apres.

Or ceste esmotion s'est tellement espendue par tout le Royaume, que le Roy a perdu de ses loyaux subiets en vn an, plus de cent mille. La garde desquels (Madame,) vous estoit commise par la volonte de Dieu: & de leur sang cruellement espendu, vous estes responsable deuant son siege iudicial, & de ce qui est aduenu le iour de la bataille, où vostre defenseur & appuy le plus proche du sang du Roy, a esté mis en la puissance de vostre ennemi & du sien: toutesfois Dieu l'en a miraculeusement deliuré, & avec luy, vous & tout le Royaume, hors de la tyrannie de c'est oppresseur, tenant la ville d'Orleans assiegee par vostre consentement, & par les forces du Roy, tant il vous tenoit estroitement enserree en ses liens. Dieu donc voulant donner repos au peuple de tant de labeurs & vexations, luy auoit là preparé son piege & vengeance de ses mesfaits & blasphemés, dont il souloit lors communément & publiquement yser, en disant. Où est maintenant leur Dieu le fort? quil les deffende s'il a cure d'eux. Mais ce grand Dieu Eternel ne dormoit pas, ains dispoit les moiés pour l'attrapper, nonobstant tous ses preparatifs par lesquels. Il pensoit auoit fait pactiõ avec la mort & l'enfer. Et a voulu ce faire par les mains d'un gẽtilhomme nommé Iehan Poltrot seigneur

seigneur de Merey, de peu d'apparence, selon le iugement dudit oppresseur, nō plus que Goliath estimoit Dauid) qui en executant la volonté de Dieu, a descoché si bien à propos (Dieu luy conduisant la main, la force, & le vouloir) qu'il l'a mis à mort, & a rompu le baston du meschant, & la verge de sa domination, & l'a frappé en l'indignation du Tout-puissant, de playe incurable: dont la terre s'esioit pour son repos. Et appliquant ce qu'Isaïe dit du Roy de Babylone, L'enfer s'est troublé de sa venue, & les hommes qui par sa cruauté estoient morts, luy ont dit, Tu es aussi bien naüré que nous, où est maintenant ta pompe & ton orgueil? Tu disois en ton cœur, J'enleueray mon siege au plus haut, mais tu es trebusché au plus bas. N'est-ce pas cest homme-ci qui troubloit la terre, & qui faisoit trembler le Royaume, & qui a mis le pays en desert & destruit les citez? à ceste heure tu es vne plante maudite, mesprisee & deiettee, comme vne charongne puante. Le Seigneur des armées l'auoit decreté, & qui l'eust peu dissiper? sa main estoit estendue, & qui l'eust destournée? Voila comment ceste Baleine monstreuse a prins fin avec ses entreprinſes, qui ont esté dissipees par ce Dieu puissant en vn moment, dont il se souloit mocquer, & de ceux que l'inuoquent.

Mais au lieu de recognoistre (Madame) qu'un tel ouurage est procedé de la main de Dieu, en faueur manifeste du Roy, & de vous, Madame, & de tout le Royaume, & luy rendre louange & gloire d'une telle deliurance, vous auez

b

per

sert l'histoire de Sceuola, qui se resolut d'aller
tuer Porsena Roy de la Toscanne, lors qu'il te-
noit la ville de Rome assiegee, & d'entrer en
son pauillon desguise, & le tuer, & deliurer la
ville de son obsesseur, & ayant tue l'un pour l'au-
tre, en la presence dudit Porsena, brusla la main
qui auoit erre, & n'auoit execute ce qu'il auoit
entrepris. Qui est celuy de bon & sain iugement
qui ait iamais repris le conseil dudit Sceuola?
Lequel au contraire en est en perpetuelle me-
moire d'honneur & louange, comme aussi sera
Poltrót en despit des bourreaux qui l'ont iuge
& fait executer. Si les iuges n'eussent este pas-
sionnez & pleins d'affections priuees, n'y eust-il
pas eu lieu de pratiquer ce que fut fait en acte
plus difficile; assauoir de decreter vne Amne-
stie, c'est à dire Loy d'oubliance qu'institua
Thrasibulus en Athenes, & depuis pratquee à
Rome apres que Cesar fut mis à mort par Cas-
sius & Brutus. Mais ils ont este transportez d'af-
fection desmesuree, comme leur execution bar-
bare le demontre par trop. Et ne faut point en-
trer es considerations qu'ilz ont receues com-
me clerks d'armes, disans que ledict Poltrót y
est venu avec simulation d'estre des seruiteurs
de l'occis, & sous intention de le tuer, Et bien,
qu'il fust ainsi, il luy estoit permis. Antigonus
interrogué comment l'on doit assaillir son en-
nemi, respondit qu'on le peut faire par dol, par
force appertement, ou par insidiation. Cest ce
que dit Sainct Augustin en quelque lieu, De-
puis qu'une guerre est declaree iuste, il ne faut

plus disputer comment on y a procede , soit par surprinses ou ouuertement: car tout cela appartient à la iustice de la guerre , souz laquelle toutes les actions d'icelle sont couuertes. Il est facile à gens transportez par fausses maximes, induire fausses conclusions seruans à leurs affections, & d'imputer faussement au vaillant Poltrot, dol simulation, & tromperie. Et bien que Cicero ait consenti avec son familier ami Aquilius, que c'est dol quād lon fait autrement que la parole signifie , ou selon qu'en dict Sainct Augustin parlant de Nathanael, quand il y a double cœur: neantmoins ils se deussent souuenir des communes doctrines de leur eschole, & de ce que Seruius & Labeo leurs Iurisconsultes ont laisse par escrit, Que tout ce qui se nomme Dol, n'est d'vne mesme parure: car il y a dol qui est tenu pour bon & legitime dol. L'autre m'auuais, & qui ne se peut excuser ou approuuer. Les simulations, embusches, & secretes entreprises que l'on fait es guerres, seront appelees dol & tromperies, tant que l'on voudra, neantmoins elles seront tenues entre gens de bien, pour bon dol, & simulations permises. Donc il est licite d'en vser iustement en toutes guerres declarees & approuuees, en assaillant & defendant. Car qui est celuy qui par les raisons militaires entreprendra de blasmer son ennemi s'il l'a surpris dormant, ou ne se donnant garde de luy, & le contraindre de venir à luy, comme s'il vouloit prendre les lieures au tabourin? Au contraire c'est vng grand

blasme à ceux qui ne se tienēt sur leurs gardes,
& ne veillent point pour destourner les entre-
prises secretes qui leur sont preparees. S. Hiero-
me a loué & approué la simulation de Iehu, le-
quel simulant de sacrifier à Baal assembla tous
ses sacrificateurs, & les mit ensemble à mort.
Ce qui est canonizé (comme ils en parlent), &
reduit entre leurs saincts decrets, en la deu-
xieme questiō de la vingtdeuxieme cause. Quel
le fut la surprise de la ville de Hay par les enfā-
s d'Israel? l'Histoire saincte le tesmoigne, & ne
pouuons contredire qu'elle ne soit iustement re-
ceue. Car les biens & la vie de nos ennemis en
iuste guerre, sont nostres, par quelque moyen
qu'on les puisse enuahir & surprendre. Et pour
ceste raison les Empereurs, Gratian, Valentiniā,
& Theodose, ne se contenterent par leurs Edits
defendre transporter l'or aux Barbares, enne-
mis de la republique, mais aussi ilz permirēt que
par subtils moyens on les peust spolier du leur.
Comme par ordonnance Diuine fut fait par les
enfāns d'Israel sur les Egyptiens, se departant de
leur pays. Et pour approcher de plus pres le
faict de Poltrot, dont est question, Aod simu-
lant faire vn present à Eglon Roy des Moabi-
tes, & luy dire quelque secret à part, le mit
à mort, & deliura le peuple d'Israel de cest op-
presseur. Cusai seruiteur du Roy Dauid, simu-
la par le commandement de son maistre, vou-
loir seruir Absalom, & luy promit, pour par-
uenir (comme il fut) à son attente, qui estoit
d'infatuer le conseil d'Achitophel, dont bien
print

print à Daud, & fut la ruine d'Absalom. Daud pour la seconde fois craignant la persecution de Saul, se retira vers Achis Roy de Geth, duquel (luy promettant seruice) il obtint la ville de Sicelech pour sa demeure: & neantmoins il employa tout son temps à travailler les Gessuriens, Gerziens, & Amalechites, & les tuoit tous, afin que nul n'en portast nouvelles au Roy Achis. Et tant d'autres exemples conuenants à ce faict, par lesquels il est loisible n'espargner par tous moyens son ennemi déclaré. Et si du commencement des tumultes il eust pleu à Dieu auancer l'execution dudit Poltrôt, il en fust par trop mieux au Roy, à vous, Madame, & à tout le Royaume. Mais les mesures & discrections des temps sont en la main de Dieu. Il a voulu que pour quelque temps pour les fautes & pechez du peuple, ce mal-heureux ait serui de fleau & de foët pour chastier le peuple: mais en fin il a pleu à Dieu ietter le fouet & les verges au feu, comme il meritoit d'estre exterminé de la terre. Et quād il vous eust pleu vous esueiller aux pitoyables lamentations & clameurs du peuple, oppressé de ceste meschante tyrannie, il estoit en vous de supprimer la source & origine de ceste guerre ciuile, dès lors qu'elle print sa naisſance à ce malheureux exploit de Valsy: lors estoit temps opportun quand les racines des tumultes estoient encores tendres & faciles d'arracher. Mais depuis que par conuiuece d'une part, & par l'audace perni-

cieuse du Cardinal, & son frere d'autre, l'estat politique a esté affoibli ; & que le mal a prins son cours par tout le corps de la Republique, à l'aide de tant de conspirateurs, il a esté en peu de temps tellement corrompu, qu'il vous a esté fort difficile d'y pourvoir.

Nous lisons qu'au tumulté & sedition que fit Absalon contre Dauid son pere, le voulant emparer de son Royaume, il fut tué par Ioab chef de l'armee de Dauid. Et combien que le Roy Dauid eust defendu de toucher à sons fils, & en eust regret pour l'affection paternelle qu'il luy portoit : neantmoins Ioab n'en fut repris, pource qu'en iuste querelle & bonne guerre il l'auoit tué, Et fut à bon droict par Ioab repris Dauid du par trop grand dueil qu'il pourtoit de la mort d'Absalon son fils, quaud il luy dit, Veux tu aimer ceux qui te haïssent, & hayr ceux qui t'aiment? Tu as aujourd'huy monstre que tu n'as cure de tes princes & seruiteurs, & que si Absalon viuoit, & nous fussions tous morts, cela te plairoit. Lors le Roy s'appaisa, & gratifia ceux qui auoyent esté au combat pour luy, & chanta vn beau Cantique, magnifiant les graces que Dieu luy auoit faites, où sont nombrez les preux cheualiers qui l'auoyent serui, & cōduit ses forces iusques à la victoire. Il est bien vray que Dauid sur ses derniers iours ordonna à son fils Salomon qu'il ne laissast point descendre la viellesse de Ioab en paix au sepulcre: mais ce fut d'autant que Ioab auoit proditoirement tué Abner fils de Ner, & Amaza fils de Iether, gens innocens & vail

vaillans. Et notamment il est dit, qu'il auoit espandu le sang en paix, cōme en guerre. Car Abner veint en Hebron s'offrir à Dauid pour estre de son parti contre la maison de Saul, & apres qu'il se fut desparti d'avec Dauid, Ioab au nom du Roy fit reuenir Abner, lequel il tua, simulant de parler à part avec luy : dont Dauid fit grand dueil. Et voila pourquoy il vouloit iustice en estre faite apres sa mort, & non pas pour auoir tué Absalom son fils en iuste guerre. Et de cela appert que Dauid approuue les executions de mort faites en guerre, & desaduoué, ce qui est fait par vindiète priuée, comme fut celle de Ioab contre Abner, contre lequel il fit les imprecations qui sont escrites au second de Samuel. Et quant à la guerre que firent les Philisthins à l'encontre de Saul, & en la bataille qui fut donnée en la montagne de Gelboé, où Saul fut fort nauré puis se ietta sur son espee, & se tua: vn Amalechite se vanta à Dauid qu'il l'auoit tué, lequel il condamna à mort, pource qu'il confessa auoir tué le Roy, contre lequel il n'auoit guerre. Autremēt eust-il iugé s'il eust esté Philisthin, cōtre lesquels la guerre estoit declaree. Ainsi que comme il n'estoit licite à Saul de se tuer, il n'estoit pareillement licite de se faire tuer par l'Amalechite. Mais quand la guerre est declaree iuste, les exploits & executiōs qui s'y font, participēt de la iustice d'icelle. Voila pourquoy il n'y a rien de semblable au faict present, avec le faict de Saul, mais plustost au faict d'Absalom: sinon qu'au siege d'Orleans, tant s'en faut qu'on eust affair-

re au fils du sang du Roy, que mesmes l'oppress-
seur du Roy & de son sang estoit celuy qui assie-
geoit ladite ville. Ioint que la iustice de la
la querelle de monsieur le Prince est fondee sur
la defense du Roy, & sur vos commandemens
& prieres, Madame, comme il a esté assez de-
claré & monstre par autres escrits. Et pour-
tant, Madame, l'on vous pourroit dire com-
me Ioab à Dauid, Si vous voulez nager entre
deux eaux, & cacher la verité de la iustice de
ceste guerre, que vous auez peu de cure des
Princes du sang du Roy, & vous preferez la
vie du conspirateur du Royaume, à tous les
parents & seruiteurs du Roy, qui ont mis
leurs biens & vies en hazard pour vostre de-
fense. La parole de Dieu nous instruit les
guerres estre legitimes, quand par le com-
mandement du Magistrat les armes sont pri-
ses pour executer la vengeance publique contre
ceux qui troublent la tranquillité de leurs pays,
soyent ennemis domestiques ou estrangers. Or
voyez ici, Madame, quelle est vostre condi-
tion, si vous auez puissance de commander ou
non. Sinon, s'ensuit vn manifeste abus que vous
aurez fait d'entreprendre d'vser de l'autorité
que vous n'auiez : ce que sauons n'auoir esté par
vous fait. Si vous auez puissance (comme à
la verité vous l'auiez) vous nous estes pour
Magistrat. Ayant donc commandé la tuition
& deffense du Roy, de vous, & du Royaume,
comme vos lettres en font assez apparoir, & spe-
cialement contre la cōiuration de ceste maison,
les

les chefs de laquelle ont esté par vous, pour iustes causes declarez pour ifracteurs de la paix & tranquillité publique, & pour ennemis de la couronne. Quel est le mesfait dudit Poltrot, pourquoy ayez pmis qu'en vous obeissant il ait esté condamné à mort? Si faute y a, elle est en vous, qui auez déclaré la guerre iuste, & non en luy qui a executé vos commandemens. Et ne sert de rien que depuis vous auez fait contenance d'opinion cōtraire: car les armes estās en main, on ne les pose de telle facilité qu'on les a receuës. Nature aussi nous enseigne que vostre deuoir estoit (comme auez fait) de faire defendre le Royaume contre la fureur importable & auarice desmesuree de ladite maison, & faire cesser les maudites inuentions de ce pernitieux bou-te-feu, cause de tous les maux. Encores que le S. Elprit nous instruisse en l'Escripture, que ceste guerre est legitime, puis que par la volonté de de Dieu il ne s'est aucune chose attentee contre le Roy, soit en sa personne ou en son estat, ne cōtre vous aussi: mais au contraire pour la liberté & repos de son peuple. Et pourtant en iuste que relle authorisee du Magistrat, les armes estant en la main de l'ennemi estant agresseur, tenant la ville d'Orleans assiegee, n'estant l'oppresseur Roy que le Seigneur eust establi sur le peuple, il estoit à la faculté d'un chacun tenant à luy parti contraire, de le tuer & massacrer. Car il en eust fait autant de tous ceux qui estoient à Orleās, s'il en eust eu la puissance: & à ceste fin il tenoit ladite ville assiegee. Autremēt il n'ya raison pour

quoy la memoire ne soit cōdamnee, & de ceux
qui ont esté avec luy, pour la mort des sieurs de
Duras, notable cheualier, de la Riuere, & de
tant d'autres gétils hommes, & de plus de trois
cens soldats de ladite ville qu'il a tuez à coups
de canons, estans en la defense d'icelle. Et ne se
trouuera par toutes les actions d'iceluy Poltrot
qu'il ait esté meu d'executer ce deuoir par affe
ction particuliere, ni pour occasion legere: mais
a esté meu & mené d'un courage du tout voué
au bien public. Et sentoit dedans luy vocation
speciale à ce faire, coniointe avec l'ordonnance
du Magistrat. Car il ne se faudroit contenter de
la seule opinion qu'il auroit receue d'executer
ceste ceuvre sans l'ordonnance publique de la
guerre. Or nous pouuons iuger par ce que des
sus, qui est tenu pour homicide deuant Dieu, ou
Poltrot qui en iuste querelle guerroyant sous
la conduite du Magistrat legitime, a tué l'enne
mi public du Royaume faisant cruelle guerre
contre les subiects du Roy: ou les fauteurs des
tumultes & conspirations ciuiles, qui sous cou
leur de iustice l'ont fait mourir, & l'ont fait exe
cuter. Les hommes en diront ce qu'ils vou
dront: mais les meschans seditieux meritent le
iuste iugement de Dieu, quelque cautelle & ca
uillation qu'ils sachent amener pour desguiser
la matiere, & colorer la coniuration de ce nou
veau Catilina, & la tourner en vertu politique.
Avec Poltrot ne sont morts tous ceux à qui
Dieu peut commander la vindicte publique. Et
quant ceste querelle eust esté traitable en iusti

ce, elle appartenoit au iugement des seigneurs
Connestable, & Mareschaux de France, & au-
tres Cheualiers à qui appartient traiter & co-
gnoistre du negoce de la guerre, & non à ceux
qui en ont cognu contre tout ordre de droict.
Et à dire verité, Madame, ç'a esté vne iniure non
petite, faite à tous Capitaines & Seigneurs qui
sont commis & establis à l'ordre militaire, que
on ne deuoit conténer d'un tel mespris. Et vien-
dra le temps que ce iugement sera espluché
par ceux à qui il appartient par raison, & lors
viendront à conte ceux qui ont commis vne
telle iniustice non tollerable. Car demandez à
telles gens que c'est de l'estat de la guerre, ils
n'y voyent clair non plus que l'aveugle à la lu-
miere. Les faisant sur vn fait posé descourir,
vous ne vistes onques gens plus ignorans, rudes,
stupides, & parlans moins à propos: & c'est
bien raison que chacun s'exerce en l'art qu'il
cognoist. Que les chefs & Capitaines trait-
tent de ce qui est de leur vocation, & les iu-
ges de ce quoy ils sont constituez. Proposez à
ces messieurs ce qui adueint à Aod contre E-
glon Roy de Moab, dont a esté parlé: ce que fit
Iahel femme de Haber fichant vn clou de fer
à la temple de la teste de Sisara chef de l'ar-
mee de Iabin roy de Chanaam, dont s'ensuy-
uit la victoire de Debora. Propose ce que la
prudente & sage Iudith fit contre Holofer-
nes capitaine general de l'armee des Assyriens,
ces pources gens estans en tenebres obscures,
seront comme tastonnans, & condamneront

comme Poltrot, les seruiteurs de Dieu, Aod Iahel, & Iudith. Et si la reuerence de l'Eseriture les retient (non pas pour l'honneur qu'ils luy vueillét faire, mais pour feindre & simuler d'en croire quelque chose) lors ils se tourneront en circuits pour chercher des subterfuges & euasions. Mais nous dirons autrement par l'Esprit de Dieu: aussi autrement eussent iugé les cheualiers auquel appartiennent les iugemens de la guerre: mais les pources subiets du Roy enfermez à Orleans, recognoissans les benefices de Dieu, tous d'un cōmun accord, cōme fit le peuple du Seigneur assiegé en Bethulie, dirēt Cantiques de louanges au Seigneur leur Dieu: O nostre Dieu, loué sois-tu, qui as auourd'hui aneāti l'ennemi de ton peuple. Or vous voyez, Madame (& à ce il vous conuien bien penser) que le reste de ceste abominable race, & mesmes ce brouillon Cardinal absent, osent bien leuer la teste pour menacer les Princes du sang, & Cheualiers de leur calibre & cōdition, avec ports d'armes & assemblees, indeues: à quoy si vous ne pouruoyez d'heure, vous cognoistrez par experience qu'aura valu ceste dissimulation, avec tel desordre que ne pourrez y mettre la main, quād bien vous l'entreprédrez. Je vous prie, Madame, me permettre vous dire que consideriez qui vous attouche de plus pres, ou le sang naturel des Princes sortis de la maison du Roy vostre fils, ou des plantes sauuages qui sont les fleaux pernitieux du Royaume? Ou qui vous est plus agreable, le repos, bien, profit, & commodité

dité de vos subiets, ou les voir tuer, brigander & piller? Ie croy qu'il y a trop de difference. Quel est donc vostre respect d'ainsi deietter les vôtres pour vne veine apparence des desseins pleins de fatuité dont vous endort ce trompeur Cardinal, que sauez auoir pille la substance de vostre Royaume, pour faire son magazin à Venize? Ce bon saint prophete, n'oteroit (dit-il) auoir touché du petit doigt la moindre chose dedice aux temples: neantmoins s'estant abstenu d'un mouscheron, il fait bien aualler le chameau: ayant spolie toutes ses eglises de ses idoles, d'or & d'argent, apres auoir longuement croupy dessus comme fit Rachel sur celles de Laban, il les â conuerties en escuz, ducatz & testons. Vous saurez si voulez vous enquerir de ce qu'il en a fait à Dijon, & depuis ailleurs. Le deuoir vouloit-il pas, Madame, qu'en ceste necessité, où le Royaume est constitué pour les larrecins & pilleries d'iceluy Cardinal, recouurer de la seigneurie de Venise les deniers qui sont au Roy, & que ce pillard y a transportez? Et de ce nous en auons exemples du Cardinal d'Amiens, du commencement du regne du Roy Charles sixiesme, qui fit le pareil, & transporta ses larrecins à Rome: & du Cardinal Balue qui viuant le Roy Loys onzieme, ne fut si habile de le pouuoir absenter: mais fut mis en la caige qui est encores à la Bastille, nommée de son nom: & en icelle fut cōtraint à redre cōte, & restituer les finâces par luy soustraites du fisque du Roy, cōme vos An-

nales, & celles de Bretagne mont appris, & l'historien François Robert Gaguin, qui dit à ce propos en l'histoire du Charles sixieme, que iamaïs l'estat du Royaume n'est plus mal traité, que quand vn prestre gouuerne le Royaume. Or est il encores temps de retirer le vostre, si voulez employer vostre credit & autorité, & trouueriez faueur & aide enuers la seigneurie de Venize si l'en requerez, nonobstant le support que ce larron y a acquise, pour couuerture & assurance de son butin. D'auantage qui vous empesche, Madame, que n'ayez faisi plus de trois cés mille liures de reuenu, qu'il a es benefices de France, & tant de belles maisons qu'il a soustraites des subiets du Roy, sans en auoir iamaïs payé vne obole? Ladite s'aisie tenant pour le moins, iusques à ce qu'il ait fait raison conuenable des deniers fiscaux qu'il a diuertis, & reestabli le pillage qu'il a fait à vos subiets. Et puis que cela est vne reigle cōmune, quelle faueur empesche qu'elle ne soit prattiquée enuers luy? Vous y penserez, Madame, à ce qu'à l'aduenir aucune chose ne vous soit imputee de c'est article. Car il y a peu de Princes, & de Seigneurs, qui ne s'estonnent qu'il ne soit ainsi fait & executé: & say qu'en iuge & pense tout le college des Cardinaux, ce qui ne luy a esté caché à Trente au Concile, & partant ne se veut fortifier a eux.

D'auantage, lon a ici publié par tout, le mescontentemēt qui accroist sans dissimulation, de ceux qui se sentent mesprisez, entre lesquelz est Monsieur le Prince de Condé, duquel nous auons

uions veu la declaration & protestation par luy
faite au conseil du Roy, vos maiestez presen-
tes, Que s'il y auoit personne qui entreprint s'a-
dresser audit sieur Admiral, de faict ou de paro-
le pour la mort du sieur de Guyse, qu'il luy fe-
roit cognoistre qu'il s'en ressentiroit, comme si
on s'adressoit à sa propre personne. A ceste cau-
se requeroit que les forces & armes du Roy ne
fussent employees pour fauoriser les querelles
de ceste maison contre celle de Chastillon, à la-
quelle il est allie. Le pareil a esté fait de la part
des sieurs Conneitable, Mareschal de Montmo-
renci, & d'Anelot, & de tous leurs parêts & a-
mis, pour la iuste defense dudit sieur Admiral.
Ceste scintille ne peut accroistre qu'elle n'ap-
porte vn grand feu. Et s'esbahit-on fort de l'au-
dace du sieur d'Aumalle, & Cardinal de Guyse,
qui cherchent leur malheur si euidet, ce qui des-
plaist fort aux plus apparés Princes & Seigneurs
de deça, voyant l'indignité de telles gens qui se
mescognoissent par trop, & se couurent de vo-
stre faueur. Et peut on cognoistre & facilement
iuger (si telle querelle ne s'esteint) que celuy
qui presume par ses menees qu'il fait par de-
ça, attirer des forces d'ici, en suscitera d'autres
contre luy, & à son grand dommage. Nonob-
stant l'expectation qu'il souloit attédre du Roy
d'Espagne, duquel vous pouuez estimer la vo-
lonté, & qu'il n'eut iamais intention de se bou-
ger que pour s'en proffit, avec dommage par
trop apparent de la couronne de France, Pour-
tant, Madame, vous auiserez selon la pruden-

Se que Dieu vous a donnée, de supprimer ceste querelle, ce qui se fera quand vous voudrez discerner par iustice & verité, ce qui appartient à vn chacun, & ne permettre à ceux qui ont prins ceste possession, d'abuser de l'autorité du Roy, de continuer ceste audace contre ceux qu'ils doyuent requérir & honorer. Et iusqu'à tant qu'aurez remis ceste reigle, & retenu leur audace impudète, & ne permetiez que les petis pour vne ombre de faueur gourmandent les plus grands, vous ne verrez que desordre & confusion, non seulement en vostre Cour, mais par tout le Royaume. Et preuoy vn tel orage, qu'il en mesprendra non seulement au reste de tels audacieux, mais à plusieurs autres, comme il aduient en toutes Republiques confuses: & spécialement à ceux qui ont deu tenir la main que desordre n'aduient, & ne l'ont point fait. De là aduient que cestot populace de Paris, plein de rage desesperée, vous fait teste, voire vous commande (ie ne veux dire pis) & vous, ont arraché de brauade vn Edict special & priuilege, que n'ont toutes autres villes du Royaume, & se vantent que le Roy tient d'eux la conseruation de sa courōne, & si n'y pouruoyez, ils vous mettront le pied sur la gorge, comme ordinaire mēt sont tous vilains à qui on permet plus qu'on ne doit. Et quand ils auront pris ceste licence d'abuser des autres, ils s'attacheront à vous, comme ils commencent à faire, vous menaçans comme gens despourueus de sens & iugement commun que si vous continuez leur
vou

vouloir faire poser les armes, ils feront assembler les estats pour vous faire destituer de l'administration du Royaume, & vous faire rendre conte de vos actions du passé, & sont apres à monopoler pour cest effet, & le voyez & le sçauiez sans vous en resentir, qui est entretenir l'audace de tels vilains artisans, desquels sont sortis (ou peu s'en faut) toutes les personnes de vostre Parlement, iusques à commander aux Rois & aux Princes. A cela, Madame, doyuent estre employees les fourches & gibets & pour cela principalement sont ordonnez, sinon que suyuant l'exemple du Roy Charles sixieme, & par priuilege special ils soyent pendus & estranglez chacun es goutieres ou fenestres de leurs maisons, comme ils furent lors pour pareille rebellion faite contre leur Roy & prince naturel. Le peuple comme à present estant suscitè aux troubles & tumultes par le Preuost des marchâs & escheuins de Paris, print les armes pour resister au cōmandemēt du Roy, tuerent aucuns officiers executâs ce que le Roy leur auoit enioint, constituerent chef de leurs tumultes entr'autres Hugues Ambriot (soit qu'il fust preuost de Paris, ou President du Parlemēt, cela sert peu a l'histoire,) maistre Jehā des Maretz Aduocat du Roy au Parlemēt, & par telz tumultes populaires fut la ville longuemēt tenue en subiection des seditieux, cōme elle est à presēt par les mutins à laide desdits de Thou, Bourdin, & Preuost des marchans : mais le Roy biē conseillé feut en peu de tēps sagemēt reme-

dier a tels tumultes, & à laissé l'exemple à la posterité du moyen qu'il faut tenir pour bien châstier ce peuple rebelle, & rabattre leur rage & insolente perrinacité. Le Roy donc se mit en armes à bien grande compaignie, & en tel equipage estant à S. Denys, la ville luy enuoye faire ses excuses, & luy offrir toute obeissance. Ne laissa pour cela à executer son entreprinse : enuoya abbatre les forteresses que les mutins de Paris auoyent faites à la porte S. Denys: ne voulut entrer par la porte: mais fit faire breche pour entrer par icelle. Ne voulut ouyr le Preuost des marchans & escheuins, qui luy veinrent au deuant : mais leur dit qu'il estoit venu pour se faire la raison : fit prendre & estrangler aux fenestres & gouttieres de leurs maisons les plus marquez & atteints de la sedition : & fit descapiter trois cens des autres entre lesquels estoit Iedict des Marez aduocat du Roy. Mais Ambriot auant l'entree du Roy, deliuré des prisons par la force du peuple s'euada, & ainsi euita l'execution de la sentence de mort contre luy donnee fit arracher toutes les chaines des rues de la ville, & les transporter au bois de Vincennes. Fit desarmer tous les habitans, iusques à lespee : & leurs armes mises au chasteau du Louure, qui lors estoit vne place forte : & fit faire deffenses à tous, de quelque qualité qu'ils fussent (les sergeans seulement exceptez, lors qu'ils feroient exploit de iustice) porter bastons iusques à lespee. Le Preuost & secheuins desmis & priuez de leurs estats & leur iuridiction suppri-

mee

mee à iamais, pour estre exercee par officiers de
ville: & ce qui concernoit la police de la ville,
fut donné au Preuost de Paris, & ioint à la iustice
ordinaire. Au reste des mutins & rebelles qui te
noient prison, le Roy à la priere des Princes du
sang leur fit grace, à la charge quils payeroyent
au Fisque, la moitié de la vailleure de leurs biens:
Ce qui fut prononcé publiquement par Messire,
Pierre d'Orgemont, Chancelier de France, en la
presence du Roy, tenāt son siege au haut des de-
grez du Palais, les mutins assistans, chacun la
corde au col, & leurs femmes & filles descheue-
lees, pleurans & demandans misericorde pour
leur maris & peres. Il fut longuement disputé de
demanteler la ville, luy oster le Parlement pour
le transmettre ailleurs, & leur laisser seulement
l'Vniuersité: aussi de abatre les maisons des se-
ditieux: mais à la priere des Princes, ceste ri-
gueur fut moderee, pour l'entretienement d'une si
grande ville, qui estoit size où les Rois faisoient
volontiers leur demeure. Je ne say qu'on en di-
roit aujourdhuy, consideré les frequētes felon-
nies, rebellions, & obstinees entreprinſes, & mes-
cognoissances enuers le Roy & les Princes, aus-
quels le Roy donne autorité. Or pour faire ce
iugement plus solennel, il fut sagement auisé fai-
re apporter au conseil du Roy, vn autre iuge-
ment donné par le Roy Charles le quint, dit, le
Sage, pere d'iceluy Charles sixieme: pour la re-
bellion de ceux de Montpellier, le mois d'Octo-
bre, mille trois cens septante huit. Par lequel fut
declaré par le duc d'Anjou frere du Roy, & gou

uerneur du Languedoc , à ce commis, qu'icelle
ville pour reparation de leurs fautes & rebel-
lions, estoit condānee à perdre tout droit d'Uni-
uersité, Consulat, maisons & arches commu-
nes, sel, cloches, & toute la iuridiction qu'ils a-
uoient : & enuers le Roy, en six vingtz mille
franc d'or. Aussi que six cens personnes des plus
seditieux de la ville, seroyent executez : Assa-
uoir deux cens descapitez, deux cens pēdus, &
deux cens bruslez : leurs enfans infames & mis
en perpetuelle seruitude, tous leurs biens confis-
quez, & la moitié des biens de tous les habitās.
Et que les murs & portaux de la ville seroyent
abatus. Et ne peurent les intercesseurs, mesme
le Cardinal de la Lune à ce enuoyé par le Pape,
aucunement faire moderer du iugement, qu'il
ne fust en tout & par tout executé. C'est ainsi
que les sages ont chastié la temerité & rebel-
lion des fols & temeraires, qui mesconoissent
la grandeur de ceux que Dieu leur a establis
pour leur commander, & ausquels sans au-
cun murmure ils deussent obeir, & se somet-
tre, & recognoistre en eux l'authorité de Dieu.
Si l'Exemple dont nous auōs ci dessus fait men-
tion, ne touche de droit fil ces furieux mu-
tins, de Thou, Bourdin, & Preuost des marchās,
ie men rapporte à eux. De ma part, ie vous puis
dire que voila l'exemple que Dieu a voulu vous
estre propose, Madame, pour trouuer reme-
de aux tumultes de Paris. C'est le droit che-
min frayé par les predecesseurs du Roy, qu'ils
ont tenu pour chastier le mutin populaire, q. ose
bien

bien leuer la teste contre ceux qu'il a constituez
Leurs superieurs souuerains, & auquelz il veut
toute obeissance estre rendue : qu'en eux on re-
cognoisse sa maiesté qu'il a voulu reluire en
ceux qu'il a establis magistrats & souuerains
Seigneurs du peuple apres luy. Et s'il a esté ainfi
pratiqué en ce temps-la, à plus forte raison doit
estre fait à present, où les rebellions & temeritez
de Paris ont esté plus enormes qu'elles ne furēt
lors. Et si autrement ce fait, Madame, il ne vous
peut aduenir que d'estre desagreable à chacune
des parties, c'est à dire à l'estat de la Noblesse, &
au tiers & commun estat, du nombre duquel
est le Parlement. Mais à ce mal le remede est
facile, ne permettant a gens mutins & sediz-
ris, de d tels que sont ceux du Parlement de Pa-
ditieux, efinir sur les matieres d'estat : & specia-
lement inciter le peuple aux armes & commo-
tion populaire, comme ils ont fait par leurs ar-
rests donnez & publiez le mois de Iuillet, 1562.
Par lesquels ils permettent avec toute impuni-
té, & sans en estre iamais recerchez à toutes gēs
de villes, villages, bourgs bourgades s'assembler,
& s'equipper en armes contre tous ceux qui vōt
aux assemblees à l'auditiō de la parole de Dieu,
leur courir sus, tāt en leurs psonnes que en leurs
biens. Et pour executer ceste barbare seditiō, ce
notable guerrier de Thou n'a eu honte partāt
du siege du Parlemēt, comme fit ledit Ambriot,
se trouuer armé pour executer sa rage cōtre les
fideles, par saccagemens & pillages, & inciter
le peuple a ce faire. Si vous demandez les chefs

& auteurs des mutins & seditieux de Paris,
pour en espargner le pource peuple qui peut a-
uoir peche par ignorace, & s'atacher à ceux qui
sont la cause du mal, voilà l'auteur, l'instiga-
teur & commoteur, avec son cousin de Marle,
Preuost des marchas, lesquels deux, avec le pro-
cureur Bourdin, sont cause de la mort de vingt
mille hommes, tant à Paris qu'és enuironz: la loy
ciuille definit celuy estre seditieux, qui fait as-
semblee de peuple contre l'vtilité publique, &
se cōstitue perturbateur du repos honnelte, au-
quel le peuple est entretenu. Et l'Empereur Gra-
tian clairement interprete celuy estre seditieux,
qui enttetient la peuple contre la discipline pu-
blique, comme sont ceux qui luy donnent licen-
ce, autorité, permission & impunité de tuer,
de meurdrir, de raur & piller le bien d'autrui.
Cicero au 3. liure des loix, sur ceste Loy des dou-
zetables, **NVLE VIOLENCE SOIT PER-**
MISE AV PEUPLE, remonstre tresbien qu'il
ne doit iamais estre permis au peuple d'vser de
force & violence. Car il n'y a rien plus d'agereux
en vne republique ne de plus perilleuse conse-
quence, ne tant cōtraire à la raison, qui est l'ame
de la loy, ne moins ciuil & humain, que permet-
tre en vne republique bien composee, la force,
les armes, & la violence au peuple: & armes les
citoyens d'une ville les vns contre les autres.
Encores ne permet la Loy au peuple punir les
crimes quelques enormes qu'ils soyent, sans or-
donnance du Magistrat. Chacun fait combien
est detestable vn Magicien & enchâteur en vne
republi

republicque, combien est execrable & pernicieux
vn empoisonneur : neantmoins tant s'en faut
que la prudence ciuile permette au peuple leur
courir sus, qu'elle condamne à mort ceux qui de
leur autorité les auoyent occis. Et sont tenus
pour seditieux, les Magistrats qui endurent en
leur Prouinces tel desordre, & ne punissent ri-
goureusement tels perturbateurs du repos pu-
blic. Que dirons-nous donc du Magistrat qui
fait luy-mesme telle esmotion, sedition & tu-
multes, qui l'ordonne & l'execute? Tels sont
les Conseillers & Presidens de vostre Parle-
ment de Paris, Madame, qui ont ordonné tels ar-
rests, qui par esprit bouillant, & rempli de cupi-
dité de vengeance, de rage & de perturbation
plus que barbare, ont donné tels trois arrests en
vn mesme mois. Tels sont de Thou, Bourdin,
le Preuost des marchans, & Marcel escheuin,
chefs & auteurs de toutes les seditions & es-
meutes, & non seulement de Paris, mais de tout
ce qui s'est fait par tout le ressort du Parlement,
qui ne se peuent excuser sous pretexte d'un ze-
le de religion. Car chacun sait qu'en croyant, &
qu'en pésent lesdits de Thou & Bourdin, q ont
tant de fois changé de religion, & ne sauent en-
cores où ils en sont mais ils ont voulu s'acquit-
ter des promesses qu'ils auoyent faites au Cardi-
nal. Voila le fondement de leur religion. Aure-
ste, ils ne croient rien de quelque religion que
ce soit. D'auantage leur Loy ciuile ne permet aux
Chrestiens nuire ou offenser aucun, soit en sa per-
sonne, ou en ses biens pour cause de la religion,

voire fut-il Payen ou Iuif, c'est ainsi qu'en parle
la Loy : par plus forte raison Chrestiens contre
Chrestiens. Ne cherchez plus donc vos seditieux
de Paris, toutes preuues & enquestes en sont fai-
tes sans plus perdre le temps, faites prédre ceux
qui sont les chefs de tant de malefices, que ne
pouuez ignorer estre tels, lors vous verrez vne
tranquillité publique entre les subietz du Roy:
& à Paris spécialement. Quel ordre y a-il que
le peuple se jette comme bestes furieuses con-
tre les premiers qu'il rencontre, & sous pretexte
de religion les tue & massacre, rauisse des
mains de la iustice les personnes condamnées,
pour les meutrir à son plaisir : & faire force à la
iustice pour accomplir leur meschante volonté,
voire iusques à tuer les ministres d'icelle? Qu'ils
dependent les corps des pources exécutez pour
les brusler, ou ietter en la riuiere? deterrer les
corps inhumez, pour les mettre en la voyrie, &
les faire mager aux chiens? de s'opposer par ob-
stination brutale aux commandemens du Roy,
& aux vostres, par lesquels leur est enuoyé d'eux
desarmer, & oser dire qu'ils n'en feront rié tant
que Monsieur le Prince de Condé fera prescher
en sa chambre estant à la Cour, & suite du Roy?
Voilà l'obeissance que red au Roy, & à vous, le fu-
rieux & rebelle peuple de Paris, voilà les fruits des
arrests de vos seditieux, Presidens & Coseillers,
& les effects qui s'ensuyuent d'auoir par temeri-
té mis les armes és mains du peuple. Voilà le
fruit d'auoir constitué premier en ce Parlement
cette petite beste sans iugement & cerueau, si-
non

non pour commouoir tout desordre & sedition, avec ce pourceau de haute graisse Bourdin. Est-ce à tels faquins à se mesurer par egalité avec vn Prince du sang, avec le Lieutenant general du Roy, & tel requis par les estatz ? Il y a dāger bien apparent, Madame, qu'en dissimulant à telle iuste punition, que les parties offensees facent la iustice d'eux-mesmes, apres leur auoir esté tant de fois desniee. Et combien que ce mutin populaire, & officiers du Roy, qui sont parmi eux, soyent du tout adonnez à troubles & seditions, & qu'il n'y ait moyen sans peines exemplaire les retenir de ceste rage & fureur, neantmoins ils sont entretenus en icelle, par la vefue du defunct coniurateur, laquelle en ce grad appareil d'habit de ducil, & voile composé propre à ceste farce, va de maison en maison criant & pleurant, inuitant les hommes à sedition, qui d'eux-mesmes se rendent faciles à receuoir ceste occasion, & couuerture de leur rebellion, aussi ils pensent estre fondez souz le beau pretexte de la cognation spirituelle Romaine, par laquelle ils sont peres spirituelz d'un Paris, fils charnel de ladite Dame, espleuree : qui a choisi telz venerables Sires, pour suscepteurs, & parreïs, d'un enfant, qu'ils font descēdu d'un Charles de Lorraine, qu'ils nous font heritier de vostre Royaume. Il seroit trop plus seant à ladite Dame, auoir hôte de ceste faute, & se retirer avec ses enfans, és lieux de l'education de leurs maieurs, & les instruire mieux, que n'a esté leur pere. Si autrement ne luy vient en volonte, de se retirer a-

uec ceste honorable & vertueuse dame, Madame la Ducesse de Ferrare sa mere, & reprendre avec elle la memoire des bons, & saincts documents & institutions, esquelles elle a esté instruite dès sa ieunesse. Plus grand bien ne luy peut aduenir, sans tant s'enuelopper aux cogitations de celuy qu'elle fait ne luy auoir iamais porté bonne & sincere affection, & que Dieu a voulu par iuste iugement chastier de son audace & temerite, qu'il auoit entrepris cõtre sa Majeste, & le regne de son Fils Iesus Christ: duquel estant deilliee, elle peut librement reprendre le pur seruice de Dieu, qu'elle a intermis, pour quelque temps. Si elle se peut bien garder de s'assubiettir de nouueau, à ce tumultueux & frenetique Cardinal, elle gaignera vn grand repos, & se souuienne qu'il a persecuté sa mere, & contredit à tous ses bons & honnestes desseins, iusques à opposer son mari le feu Duc de Ferrare contre elle: & depuis induit le feu Duc de Guyse son mari, à luy porter peu de volonté, dont il en a laissé preuue, par ce bel escrit, intitulé Recueil des derniers propos que tint & dit le sieur de Guyse, auquel ayant confessé ses villenies, & adulteres, luy en demande pardon, comme il luy pardonne de sa part. Tirant en suspension peruersé ladite Dame, sans auoir esgard à l'honneur qu'elle luy auoit fait de le prendre & receuoir en mari, elle issue, & sortie du sang de France, qui est plus grand honneur qui ne luy appartenoit. Et m'a bien despleu, Madame, que le meschant escrit soit diuulgué, par tout, & trāslaté en

nostre vulgaire, & dispersé par tout le pays
Pleust à Dieu que la France, fust plus sobre à di-
uulguer esens partât de mauuaise boutique, &
fust-il de l'Euesque, qu'on dit autheur diceluy.

Il est aussi trouue tort estrange par plusieurs
grands Seigneurs, qui s'esbahissent, Madame,
qu'ayez voulu mescontenter par tort euident vn
viel & ancien Cheualier, sage, & de lōgue expe-
rience, monsieur le Cōestable duquel (encores
que par les menees des desusditz, il ait esté atti-
ré, & amené à cōmuniquer, à leurs entreprises,)
vous auez receu tāt de louables seruices, & non
de luy seuilemēt, mais de toute sa maison aussi,
pour le priuer d'vn estat qu'il a cōduit, & manié
si lōguemēt, & au cōtētemēt de troys Rois, &
qui n'a iamais esté qu'es mains de gens, dont la
probité, vertu, & conduite, es affaires d'estat, fust
approuuee de tous : & ce a l'appetit d'vn ieune
enfant, auquel seroit trop mieux seant, vn sac de
noix en main, que porter le baston de dignité de
Grand maistre. I'ay appris à vostre suite, Mada-
me, que le plus grād estat de la maison du Roy,
apres le Cōestable, est Grād maistre de l'hostel
du Roy, qui a cognoissance & iurisdiction, sur la
maison du Roy, de la Roine, & de Messieurs ses
enfants : & auquel appartient d'en faire les estats.
C'est pour-quoy, quād il sert le Roy de son estat
il n'y a maistres d'hostel, de toutes lesdictes mai-
sons, qui portēt leurs bastōs en sa presence: reco-
gnoissans par là, qu'à luy seul appartient la genera-
le cōduite desdictes maisons. A luy respōdēt les
autres maistres d'hostels ordinaires desdicts ho-

stels les Preuosts de l'hostel du Roy, & generale
mēt à lui se rapportēt, tous les affaires de la mai
sō du Roy. Et si nous voulōs prēdre fōdemēt, sur
l'origine d'institution de cest estat, & sur ceux
qui ont esté pourueuz, en quel aage, & apres
quels seruices de vertu, & de prouesse: no' trou
uerōs que les grāds Maistres de Frāce, iadis nō
mez Cōtes du Palais (nō du palais de Paris, cō
me aucuns ont escrit, mais de la maison du Roy
qui iadis s'appelloit Palais,) à cōmencer depuis
messire Lādry de la Tour, du tēps du Roy Chil
perich, Lan cinq cens septāte six, auoyēt, & à eux
appartenoit l'estat, nō seulemēt de la cōduite de
la maison du Roy mais aussi de la Cheualerie de
Frāce, qui depuis a esté cōmise aux Cōnestables,
office du depuis erigē: & y ont esté toutes per
sonnes eleuēs & choisies de grāde prudence &
bon cōseil. Depuis lequel de la Tour, iusques à
present, s'en retrouuēt iusques à septāteneuf, cō
pris mōsieur le Mareschal de Mōtmorēci, à qui
ledit estat de tout droit partiēt: tāt s'en faut
qu'il se trouue, que iamaïs on y ait commis ou
proueue des enfans. Et s'il nous souuiēt de dix
precedēs mōsieur le Connestable, voyons quelz
personnages ont esté messire Ieā de Croy, gou
uerneur de Picardie, Charles de Melū, lieutenāt
general du Roy Loys vnzieme, Antoine de
Croy, fils dudit messire Ieā, Geoffroy de Villars
Charles d'Artois, Côte Deu, apres auoir obtenu
viētoire en Constātinople, Pierre de Castelnau,
de la maison de Clermōt en Lāguedoc, George
de Mōtagu, seigneur de Listenois, George de la

Trimouille, apres auoir fait plusieurs recōman-
dez seruices au Roy, en Italie, Charles d'Amboi-
se, duq̃l les vertus, & vaillāces sont notoires, Ia-
ques de Chabanes, seigneur de la Palice, q̃ fut tué
deuāt Pauie, Art^o Gouffier, seigneur de Boisy, &
René Bastard de Sauoye? Voyez (di-ie,) Mada-
me, si esdits psonnaiges lors de leurs promotiōs,
il y auoit chose puerile? C'est ainsi que les Ro-
yaumes prosperēt, quād les estats sont honorez
de la vertu des hōmes, qui y sont commis. Ce
n'est pas donc vn estat de parade; mais de grād
soin & labeur, qui ne doit, sans charge de con-
science, estre mis en la main d'vn enfant, duquel
on ne se fieroit de la garde d'vne pomme. En ce
faisant, ce n'est pas pouruoir aux estats de la mai-
son du Roy: mais les corrompre & contemner
du tout, donnant vne charge si difficile à celuy
qui ne se peut conduire soy-mesme: l'exercice
de la iustice à celuy, qui ne peut ester en iuge-
ment. Et n'y a pas moindre absurdité de bailler
le batton de la maison du Roy, à vn enfant, que
de donner l'espee de Conestable à vne femme,
ou l'estat de Chancelier, à vn muet, ou sourd, en-
cores qu'il y eust en quelque exemple, qui eust
induit à faire cest erreur: mais depuis que l'estat
de Grand maistre est erigé en France, ne s'est ia-
mais veu vne telle profanation. Et si nous con-
siderōs quelle est l'vsance des voisins du Royau-
me, comme des Empereurs, Rois des Romains,
de Hongrie, Boeme, de Dannemarc, de tous les
Princes de la Germanie, des Rois d'Espaigne, de
Portugal, d'Angleterre, & d'Escosse, & de tous

les Potentas de l'Italie, il ne se trouuera qu'ils a-
uent iamais baillé l'estat d'un simple maistre d'
hostel, tant moins de leur chef, & superieur, es
mains & conduite d'un enfant. Et ce pendant,
Madame, ce bel exemple à pris son origine &
commencement de vous, qui ne vous peut tour
ner, qu'en blasme, & à ceux qui vous ont donné
ce conseil, C'est la vraye corruption & degast
de toutes republiques, quand l'on commet aux
charges personnes indignes: & specialemēt, en-
fans qui par defect d'aage, ne sçauent qu'ils vo-
yent, qu'ils oyent ou qu'ils font. A quoy vous
deuez d'autant plus songneusement regarder,
Madame, que les Rois, quand ils errent, ils ont
leur autorité & grandeur, qui couurēt leur er-
reur: mais les gouuerneurs qui sont cōmis pour
quelque temps, sont subiets à reprehension & syn-
dicat, si de pure volonté, sans raison, ils diffor-
ment l'estat politique. Et à la verité, c'est vn mō-
stre au corps politique, de veoir vn enfant tenāt
la charge de la conduite de la maison du Roy.
Laissez donc iouir les anciens Cheualiers des
estats, respōdants à leurs aages, prudence & expe-
rience, & ne leur faites ce tort lēs en despouiller
pour pour faueur indeuē les transporter à ceux
qui n'ont conseil ne iugement pour les admini-
strer. Aussi vous souuiēne, Madame, combien
dés, & depuis le regne du Roy Henry, les Prin-
ces du sang, & autres naturels dudit Royaume,
ont esté reculez du degré d'hōneur qui leur ap-
partient, pour esleuer & exalter ladite maison
de Guyse, tant es affaires, au Cōseil priué du Roy
qu'ail

qu'ailleurs, qui ne se peut, ni doit raisonnablement continuer.

Madame, ie ne puis pour mon deuoir, vous cacher vne autre plainte, merueilleuse, que i'ay ouye de plusieurs grands Princes & Seigneurs, lesquels aduertis que sans telle discretion & mesure qu'on doit, l'on accroist le nōbre des Cheualiers de l'ordre du Roy, sans garder l'honneur de l'ancienne dignité d'iceluy, par confusion de gens de toutes fortes, voire qui sont extraits de villenie, sōt deliberez de rēuoyer leurs ordres au Roy, puisqu'on en fait autāt qu'on souloit ici faire de Prothonotaires, & que de present l'on fait de Cardinaux, de quelque cōditiō qu'ils soyent. Iadis les Rois, Prīces souuerains, & autres vaillās Seigneurs, q par faits d'armes auoyēt acquis degre d'honneur, enuers les Rois, estoient appelez en ceste fraternité & societé honorable, de cest ordre. Quel deshōneur fait on à vn Roy & à vn grād Prince q a receu cest ordre, de l'incorporer par fraternité avec gēs de vile & basse cōdition? Le Roy fait cest hōneur d'appeler tous Cheualiers, de son ordre, ses Cousins: est-il decēt, qu'un faquin, vn hōme plein de deshōneur & vilenie, soit fait cousin du Roy, frere de tant de grands Princes, & notables Cheualiers? Ils sauēt ceux qui sōt tels, & les nōment par leurs nōs, ausq̄l ils ne voudroyent bailler rāg qu'au nōbre de leurs palefreniers, quelq̄ ordre qu'il ayēt pēdu au coi. Le premier article des statuts & ordonnāces du Roy, porte que le nōbre des Cheualiers, doit estre de treēte & x gētils-hōmes de nō & d'armes,

fans reproche: dont le Roy, sera l'un, qui se nommeront Freres, & compaignons de l'ordre. Et en l'article quarante-huitieme, est ordonné que par le decez d'aucun des freres, dudit ordre, l'election soit faite d'un autre Cheualier, des conditions que dessus, par le plus grand nombre des voix du Souuerain, & freres de l'ordre, que la voix du Souuerain, soit contee pour deux voix, & non plus. Depuis vn an, Madame, quel a esté ce desordre, que sans cōsiderer les decedez Cheualiers, sans le Conseil des Cheualiers viuans, ont esté faits plus de quarante Cheualiers dudit ordre: la bōne part desquels ne fit onques preuue de leurs personnes, en aucun seruice de guerre? Aucuns ont esté faits Cheualiers auant que d'estre gentils-hommes, ne tenus pour tels. Encores qu'estans tels, tel nombre desmesuré, ne peut rien auoir d'hōneste. Et si cela n'est corrompre tout ordre, decent & honnesteté, ie m'en rapporte à vous. Et bien, que ceux qui vous ont commandé indeuement en soyent en partie cause, le blasme neantmoins vous en demeurera, & sera bien employé quand il aduendra ce qu'ils proposent faire, que les preux Cheualiers quitteront ledit ordre, afin que le reste soit d'une parure, & qu'en fin soit pour note de infamie d'estre dit & nommé Cheualier de l'ordre du Roy. Et pour ceste reputation, il se dit maintenant en ce pays par commun prouerbe, q̃ l'ordre du Roy est, *VNA CAVEZZA A OGNI ONA BESTIA*, vn collier à toutes bestes, ce qui ne soubliera facilement, puis qu'il est receu & parueni

iufques à la bouche du peuple. Je croy que ces propos vous eft aigre, fi eft-il à moy-mefme, qui l'efcri: mais ayant pris charge des Cheualiers d'honneur de le vous faire entendre, ie ne puis moins que de m'en acquitter de bonne foy.

Et pour ne laiffer rien en arriere, vous ne pouuez ignorer, Madame, quelle a efté la refolution des eftats de France pour la repurgation du Cōfeil du Roy, que perfonne ne fuit admis en iceluy, qui eult ferment à autre Prince. Laquelle conclufion des eftats ne fe peut violer pendant la minorité du Roy: ce neantmoins contre tout ordre de police, y auez introduit le legat du Pape, le Cardinal de Ferrare: chofe infolite & non iamais ouye, qu'un ambaffadeur d'un eſtranger, faifant fa charge d'ambaffade, foit admis au Confeil du Prince auquel il eft enuoyé. C'eft comme fi l'on vouloit publier tout le ſecret du Roy par tout le monde. D'auantage, pourquoy ne ſeront en pareil admis audit Confeil les ambaffadeurs de l'Empereur, du Roy d'Eſpaigne, d'Angleterre & d'Eſcoſſe, comme l'ambaffadeur du Pape? Auſſi quelle raifon y a-il, que les differēs qui peuuent aduenir avec les Princes voiſins dont les ambaffadeurs ſont vers vous, ſoyent iugez par meſmes ambaffadeurs & que l'un des ambaffadeurs ſoit plus reſpecté que les autres? Et s'il y auoit lieu de faueur, elle deuoit plus raifonnablement tirer de la part du Roy d'Eſpaigne, à cauſe de la Roine ſa femme voſtre fille, que non de celuy qui ne vous attouche en rien. Cela ſ'eſt trouué fort indecent par tout.

Pourquoy donc ici où est vostre ambassadeur ne luy a esté fait pareil honneur que vous auez fait au legat ? Car il faut (& ainsi est l'vſance) que les ambassadeurs ſoyent également reſpectez. Mais pour toute recompense ils ſe ſont moquez ici de ce nouuel honneur : & ce pendant ils en ont fait leur proffit, pour les aduertissemens qu'ils ont receu de tout ce qui a esté proposé au Conseil du Roy. Je croy que ſoyez bien aduertie, que ceste assemblee confuſe (comme de ratz en paille) de Trente, ou les Legatz du Pape preſident : à bien entrepris contre tout deuoir & obseruance ancienne, voire present le Cardinal de Lorraine, maistres des ceremonies, de prepoſer l'ambassadeur d'Eſpaigne, à celuy de France, le Catholique, au Treschrestien : le puisné, au fils aîné, ainſi que le Pape à accouſtumé d'en parler en ſes bulles & breuets. Voyez ſi ce pendant vous auiez raiſon de faire ce nouuel priuilege, à ce reuerend Legat, avec ſa pellade. L'experience vous a peu apprendre combien vous a esté pernicleux ſon conſeil, & quel deſordre & calamité il a apporté à tout le Royaume. Et non ſans cauſe : car d'où luy viendroît amour ou affection aucune au Royaume ni aux ſubiets du Roy ? Il n'en falloît donc eſperer aucun conſeil que pour la ruine & perdition di-celuy. Je laiſſe la beſtiſe, & vraye aſnerie de ceste groſſe maſſe de chair, le Cardinal de Guyſe, qu'on peut par raiſon pluſtoſt eſtimer beſte qu'homme, duquel la vie desbordée & honteuſe deuroit ſuffir pour

le dechasser de toute bonne compagnie. Et neât
moins ce sont ces deux belles statues muettes,
qui seruent de parade au Conseil du Roy, & re-
çoquent le prix d'honneur, au grand domage
de la republique, Je ne parleray des Presidens,
que vous distrayez de leurs charges, lesquels de-
sapparent le Parlement, cōtre tout deuoir, pour
instruire le Conseil du Roy des chicaneries &
tromperies des aduocatz du Palais, pour bien
crocheter le bien d'autrui. Vous saurez à tard,
apres qu'ils aurōt corrompu le Conseil du Roy
de leurs finesses & cautelles, qu'il ne se pouuoit
pis faire pour le Conseil, que d'y admettre telles
personnes, à qui il n'appartient de cognoistre,
ne cōsulter des matieres d'estat, qui passent leur
portee. C'est à eux à cognoistre des gouttieres,
des cloaques des maisōs, de la vache & du pour
ceau: des partages & cōtrats, & autres questiōs
princes d'entre vos subiets: faire punition des
crimes & delits des pources prisonniers, dont la
conciergerie regorge, & où ils font tresmal leur
deuoir: mais ils cherchēt moyen d'eschapper de
leurs clostures, pour mordre & manger en deux
ratelliers, & assouuir leur auarice & ambition,
qui les tiennent par trop occupez, & desquelles
vous fera preuue leur acceleree, & tātost acreuē
richesse & faculté, dont ils sont gorgez, estans
venus de pources mercenaires, & deneant, en tel-
le abundance qu'ils ne se peuuent cacher d'e-
stre tenus pour voleurs & larrons publiques,
des facultez de vos subiets, qui ont par necessi-
té & contrainte de iustice, à faire à eux. Dieu

vous face la grace de vous ouurir les yeux, & veoir clairement, les meschantes operations de ceux qui par simulation de iustice, font double iniquité.

Reste vous aduertir, Madame, & admonester au Nom de Dieu, tenir la balance de iustice en egalité & droicteure, que nous voyons estre iniustement destournée à l'oppression, foule & outrage de plusieurs. Vous auez donné par vostre edict, liberté de conscience à tous vos subiects, sans estre recherchez, chose fort agreable aux subiects du Roy s'il est entretenu: neantmoins vostre edict, n'a si tot esté establi, qu'il n'ait esté foulé & corrompu, en forçant les Conseilliers de Parlement & autres, en leurs consciences, les contraindant faire profession & confession publique, de la religion Romaine. Cela ne peut conuenir à la liberté de conscience, cela n'est entretenir la liberté que vous auez promise, par vos edits. Ne vous abusez point, les subiects du Roy, sont munis deuant Dieu & le monde, de l'edict de Ianuier 1561. Vous sauez celuy qui par force & contrainte l'a violé & corrompu, sans auoir esgard, qu'il auoit esté basti avec telle solennité & conseil, qu'il ne deuoit estre aboli, tant que le Roy fust paruenu en aage de pouuoir luy-mesmes commander. Car tant que durera ce bas aage, iusques à l'accomplissement de quatorze ans, il est sous le gouuernement des estats de France, & par leur consentement entre vos mains. Non pour cōstituer nouuelles loix, & nouueaux edits,

ou corrompre les constitutions accordees: mais pour entretenir ce qui auoit esté meurement establi, pour iceluy temps. Pourtant vostre deuoir estoit deuant Dieu, & les subiets du Roy, vostre fils, faire entretenir cest edict de Iânier, que ce malheureux perturbateur du repos public, commença de rompre & violer, à Valsi. Neantmoins les pources fideles reculans de leurs droitz en toute humilité & obeissance, par esprit de mansuetude, accepteront toute raison, vous supplians qu'ils ne soyent forclos de la predication de la Parole de vie, & reconciliation avec leur Dieu: aussi que sous pretexte de belles paroles, il n'y ait rien caché, & qu'on ne les vueille surprendre sous faux titre de paix & d'amitié. Car, assurez-vous, Madame, que quelles que soyent vos intentions, que Dieu qui a, & aura soin de sa cause, & qui aime, & se donne garde des siens, comme de la prunelle de son œil, voit plus clair que ceux qui dressent les pieges & laqs aux simples fideles, qui se confient à sa providence, & s'attendent qu'il ne leur perira chose quelconque, sans la disposition de ce Pere celeste. Prenez conseil, dit, Isaïe &, il sera dissipé: dites la parole, & elle ne sera establie, pource que le Seigneur est avec nous. Orleans, Bourges, Issoudun, & tant d'autres villes, vous ont promptement obeï, & ont posé les armes: quel equilibrium de iustice est-ce quand ceux de Paris, d'un front d'airin & sans vergongne, respondent qu'ils n'en feront rien? A cest exemple rebellent, les villes de Tours, le Mans, Rouen

Char

Chartres & autres. Dieu merci, vous n'oyez point tel langage de ceux qui le craignent, ieruent & honorent, & en ce faisant, veulent rendre toute obeissance au Roy, & à vous, Madame, comme leur est commandé par sa Parole. Quelle est vostre taciturnité & cōniuece, que ce mal-heureux (a fin que ie ne die pis) Cipierre qu'auiez esleué outre mesure, a prohibé le Cōsistoire à Orleans, & tout ordre de discipline Ecclesiastique aux fideles seruiteurs de Dieu: qui ne permet leuer deniers pour les pources & education des Ministres: à voulu desnier la sepulture publique, aux fideles decedez, ne permettant qu'ils soyēt enterrez au Cemetiere public, chose obseruee par sainte instruction, en memoire & esperance de la resurrection generale? En telle tollerance, ne pouuez faire croire que la droiture de la balance soit tenue, pour l'obseruance de l'edit qu'auiez fait n'agueres publier. Ne cachez point vos desseins, telles actiōs rendēt suspecte vostre intentiō de vouloir supprimer l'Euāgile, & par telles cōduittes esteindre la memoire de la parole de Dieu, & nous separer loin à loin, pour plus facilement nous accabler, comme a este fait du passé. Et Dieu voudra que tels desseins & cōseils, d'eux-mesmes, sans que les fideles se departent du deuoir de l'obeissance qu'ils doyuent au Roy & à vous, soyent dissipez, & que ceux qui dressent les fosses en cachette, tombent en icelles. Ceux qui sont autheurs de tels cōseils, sont ministres d'iniquité, qui tascent à remettre les armes es

mains

maines des subiects du Roy, & à nouveaux tumultes, plus d'agereux que les premiers. Dieu vueille qu'il n'en soit rien. Si est-ce qu'il ne tient à eux qu'ils ne recōmencent à troubler tout le mōde.

Or, Madame, puis que Dieu vous à constituee & establie, pour exercer estat de Magistrat, entēdez & cognoissez que vostre premiere & principale charge, est de ordonner sur le seruice de Dieu, à fin qu'il soit purement & sainctement entretenu selon sa volonté, declaree en sa saincte Parole: à quoy conuiennent les auteurs prophanes: entendu qu'en ordonnant leurs Loix ciuiles, ils ont premierement & principalemēt traité de la Religion. Et pourtant ne doutez aucunement, que les deux tables de Moyse, vous soyent mises par cōmendement de Dieu en main, pour les faire obseruer: & specialement pour en icelles, & generally en toute l'Ecriture, faire instituer le Roy, vostre fils, & pupille: à fin que le liure de la Parole, ne departe de sa presence, comme il est constitué en la Loy. Et depuis estāt ceste ordōnance defaillie, fut restituee par le bon Josias. Et cest à bōne raison, puis que le Roy paruenue en aage, & vous ce pendant qu'il paruiendra, estes vicaires & principaux officiers de Dieu & que vous auez l'authorité, préeminence & domination, par sa grace & volonté, que vous, vous employez à maintenir son honneur & seruice. C'est la plus grande louange qu'ayent iamais eu les Rois, tesmoignee par l'Ecriture saincte d'auoir remis au dessus le seruice de Dieu quand il a esté corrompu, & d'auoir eu le soin

d'entretenir: en leur domination la vraye religion. Conseruez donc ce que Dieu vous à donné en charge du faict de la vraye Religion, puis s'ensuyura la tranquillité, l'honnesteté, l'innocence, & la modestie publique: afin qu'il y ait paix, bonne harmonie & conuenance avec les subiets du Roy: dont vous & le Roy, deuez estre les patrons, honorant les gens de bien, seruiteurs de Dieu, & ne dissimulans point les forfaits des meschans, principalement ceux qui se forgent religion nouuelle. T'apelle, celle qui ne conuiet avec la sainte Escriture & commandemens que Dieu à prescrit à son peuple & fideles: où est empreinte, & sa verité, & sa volonté. Et vous souuienne de la sentence de Dyon, Qu'il n'y a rien pire que viure sous vn Prince, qui laisse toutes choses à l'abandon. La parole de Dieu prescrit aux Rois & Magistrats leurs charges & loix, faire iustice, & recognoitre qu'ils exercent l'office de Dieu faisans leur deuoir: & que tout ce qu'ils feront, reuiendra sur eux. Qu'ils doyuent retirer les pources de la main de l'oppresseur. Ne doyuent multiplier leurs cheuaux & despence inutile & indeue: mais se moderer, & tout le temps de leur vie mediter la Loy de Dieu: faire iugement & iustice. C'est iustice de receuoir les innocens en leur sauuegarde: c'est iugement de resister à la hardiesse des meschans, reprimer leur violence, & specialement à ceux qui persecutent Iesus Christ en ses membres & enfans. Aussi il

il appartient aux Rois & Magistrats, de recevoir tributs & impôts de leurs subiets, qui leur sont reuenus legitimes, tant pour soustenir les grandes charges de leurs estats, qu'aussi pour entretenir en honneur & dignité leur maison, comme les bons & saincts Rois, Dauid, Iosaphat, Ezechias & Iosias en ont fait. Aussi le Prophete Ezechiel nous instruit, que par ordonnance de Dieu, grandes possessions furent assignees aux Rois, à c'est effect. Mais cependant qu'ils n'oublient qu'ils sont en ce lieu eminent, constituez pour estre peres du pays, pasteurs du peuple, gardiens de paix, protecteurs de iustice, & pour bien mesnager, ce qu'il leuent de la propre & necessaire substance de leurs subiets, comme si l'on tiroit du sang de leurs propres veines: à fin qu'ils n'en abusent par prodigalité, & qu'ils les dispensent en saine conscience deuant Dieu. Les subiets trouueront ici leur leçon, Honorer le Roy: & en Salomon, Craindre Dieu & le Roy, leur attribuant vne grand dignité & reuerence. Et saint Paul dit, qu'il le faut ainsi faire, non seulement à cause de l'ire, mais pour la conscience: conioignant ceste obeissance avec le seruice de Dieu, en faisant leur charge, selon qu'il leur est enioint. Et que l'obeissance que leur rendent leurs subiets, ne les destourne de l'obeissance de Dieu: sous la volonté duquel il est raisonnable que tous les edicts des Rois, se contiennent, & que tous leurs commandemens cedent à son ordonnance, & que toute hautesse soit humiliée & abaissée, sous sa maiesté.

Il est vray que le subiet, se retirant de ceste obeissance contraire à la volonté de Dieu, ne doit outrager l'autorité de son superieur, laquelle luy doit estre pleine de maiesté, combien qu'il en abuse, se departant de l'ordonnance du Seigneur, sous la puissance duquel il regne. Car le subiet n'a mandemēt que d'obeir où de souffrir, & non pas de s'esleuer contre son Prince. Daniel n'obeit au commandement du Roy, qui estoit contre l'honneur de Dieu, mais il se contient, & proteste de n'auoir en rien offensé le Roy, & neantmoins il auoit contredit quant à luy, à ledit publié. Le peuple d'Israel est condamné en Osee, d'auoir obei aux meschantes loix des Rois idolatres. Les Princees d'Israel, dit le Prophete, ont transporté la borne. Je suis, dit le Seigneur, vn lion à Ephraim, & vn lionceau, à la maison de Iuda. C'est moy, c'est moy qui rauray & men iray, j'emporteray la proye, & n'y aura personne qui la deliure. Neantmoins pour cela le peuple n'est commandé, & ne doit s'esleuer contre son Roy: luy fuffise de dire, avec saint Pierre, comme il est escrit, és Actes. Il faut plustost obeir à Dieu, qu'aux hommes. Et s'il souffre, en ce faisant, il rend lors à Dieu telle obeissance qu'il demande. Permettez donc, Madame, que sous l'obeissance du Roy & la vostre, vos subiets facent iugement de discretion entre Iesus Christ, & son aduersaire. Nous sōmes tāt de fois aduertis en l'Escripture, de nous dōner garde de Satan, & de ses ministres, & specialement de l'Antechrist, des faux christes & faux prophetes,

qu'elle nomme loups desguisez, sous peaux de brebis, & Satan transformé en ange de lumiere: pour n'estre trompez de leurs cautelles & deceptions, qui vienēt pour perdre & dissiper le troupeau de Dieu, qu'il s'est acquis par le precieux sang de son Fils Iesus Christ, qui est vn pris inestimable. Nous sommes es derniers temps preueux par S. Paul, en Esprit prophetique, qu'il y aura plusieurs destournez de la foy, qui s'adonneront à esprits d'impostures de mensonges, doctrine des diables & traditions des hommes, pour peruer tir & corrompre la droite voye que Dieu par Iesus Christ son Fils. nous a commandee de garder. Et en plusieurs lieux de l'Escripture est descouuert au doigt & à l'œil, le prince & chef de leur coniuration, qui est ce fils d'iniquité & perdition l'Antechrist, aduersaire de Dieu, & opposé au Royaume de nostre Seigneur Iesus Christ, qui premierement par mensonges, & depuis descouuert par tyrannié & cruauté, a dissipé entāt qu'à luy est nostre petit troupeau. Nous cognoissons ses armes: l'vne est faulse doctrine, l'autre rude persecution, à laquelle il excite & princes & subiets. Et pour nous en garentir, il nous suffit la puissante parole de nostre Dieu, & foy en icelle. Et combien que dès le temps de saint Iean, il y auoit plusieurs Antechrists, comme il y en a encores plusieurs: neantmoins il y en a vn excellent par dessus tous, meslé parmi les Chrestiens, qu'il faut par necessité descouvrir, & luy arracher ses masques & le produire en triomphe par toutes les Egli-

les, à ce qu'il soit marqué, & qu'il ne face plus de peur aux enfans & infirmes, comme il a fait par-ci deuant: & pour descouurir ce fantosme & fadaize, de ses illusions, il n'y a chose plus propre que des'armer de verité & lumiere: car si tost qu'il comparoistra en lumiere, & en la presence de verité, toutes tenebres & menfonges au milieu desquelles il tient sa puissance & empire, comme fait Satan qui la establi, s'euanoiront incontinent, & perira ceste fable de la puissance de l'Antechrist, qu'il ne faut craindre: c'est vne beste, & vn monstre, & impuissant ennemi, qui n'a vertu ne pouuoir, & ne peut rien de luy-mesme: mais l'emprunte de laide des Princes, qu'il a enueloppez de ses menfonges. Permettez qu'il soit escorché de la faulse peau dont il se couure, vous n'y trouuerez qu'un asne miserable, infame, vain & plein d'imbecilité. Je ne veux perdre le temps à le vous nommer, & prouuer qui c'est, mais vous suffise, que ie le vous monstre de si pres, qu'il ne peut eschapper d'estre de vous cognu. Nō q' i'en vueil le faire vn homme particulier: mais plusieurs par succession d'estat, s'opposans au regne de Iesus Christ, qui a de plus en plus accreu secrettement ceste puissance, sur les enfans d'incredulité, iusques à ce que la Chrestienté (quant au public) est deceuë en l'apostasie, dont ont parle & predict Isaie vnzieme chapitre, & saint Paul, en la seconde aux Thessaloniens second chapitre. Et pour le faire court, l'Antechrist est celuy-mesme que Daniel a predict, celuy mesme qu'a demō

fré Ezechiel par Gog & Magog. De Zacharie
proposant vn fol pasteur, ou plustost vne idole
de pasteur. Je laisse ce que l'on en peut aperte-
ment tirer de l'Apocalypse, à ceux qui le vou-
droient faire. Mais Isaie introduisant Iesus
Christ nostre Seigneur publiant l'accomplisse-
ment de la charge qui luy auoit esté commise
par Dieu son Pere, Je suis le Seigneur (dit-il)
c'est mon nom : ie ne communiqueray à autrui
ma gloire. La gloire de Iesus Christ est que luy
seul par l'effusion de son sang est nostre Redem-
pueur & Sauueur : luy seul nous à deliurez des
liens de peché, de la mort, de l'enfer, & de la ty-
rannie de Satan. Et à ce moyen est à bon droict
nommé nostre Seigneur. C'est vrayement ceste
gloire, de laquelle il est ialoux, & qu'il ne com-
munique à aucune creature, soit au ciel, soit en
la terre. Celuy donc est l'Antechrist, qui-
conque s'efforce d'arracher ceste gloire & hon-
neur de nostre Seigneur & Sauueur Iesus Christ,
& se la veut approprier. Quiconque s'attribue la
remissiõ des pechez, les dons de salut, les graces
du saint Esprit, & le Royaume des cieux, soit
enuers les viuãs & encores pis enuers les morts,
celuy veritablemēt est l'Antechrist. L'antechrist
est, qconq̃ est entré en telle audace & temerité
d'vsurper le nō Sacerdotal, & q̃ s'ingere de sacri-
fier pour les pechez du mōde, qui se cōstitue in-
tercesseur pour les viuãs & les morts : autremēt
qu'il n'est permis par la parole de Dieu, prier
les vns pour les autres. Celuy qui cherche ce que

dessus, ailleurs qu'en nostre Seigneur Iesus
Christ, qui corrompt l'vnique & perpetuel sa-
crifice, qu'il à vne fois présenté à Dieu son
Pere, pour expiation des pechez de son peu-
ple, celuy, di-ie, est vray Antechrist. Mais celuy
qui est assis comme Dieu, au temple de Dieu, &
se declare pour Dieu, & qui prend de soy-mes-
me titre de Vicaire de Dieu (combien que Iesus
Christ soit le chef de son Eglise) dechassant en-
tant qu'en luy est Iesus Christ, de l'administra-
tion du sceptre, qu'il à receu de Dieu son Pere:
tel homme de peché quel qu'il soit, & fils de per-
dition: est non seulernēt Antechrist, mais le Prin-
ce & chef de ceste abomination, grand & su-
presme Antecrist, auquel Satan commun enne-
mi de tout le genre humain, a mis ses forces
& vertus principales, ses tromperies & impostu-
res, pour deceuoir le monde, & le tirer en per-
dition. C'est celuy, (comme mesmes Gregoire
pape, qui depuis fust nommé le grand, escriuant
à Maurice Empereur dit,) qui veut estre dit &
nommé Euesque vniuersel, est precurseur de
l'Antechrist, n'ayant osé dire, qu'il fust vraye-
ment Antechrist: ce qu'il à confirmé escriuant à
Anastaze Euesque d'Antioche, & à Euloge Eues-
que d'Alexādie. Celuy donc, qui en sa vie, meurs
& doctrine, s'oppose & se rend contraire à Iesus
Christ, ne sera à faux titre dit & nommé Ante-
christ. Et de faict, Iesus Christ, publiant la vo-
lonté de Dieu son Pere, à laissé exemple de toute
humilité, en faits & en dits, dont escrit Isaie, &
apres luy saint Matthieu, qu'il n'a point brisé le
roseau

roseau cassé, & n'a point esteint le lin fumant,
mais qu'il produira iustice en verité. Il a esté en
ce monde comme celuy qui à serui & ministré,
& en la fin de sa conuersation en ces bas lieux, il
s'est humilie iusques à lauer les pieds de ses di-
sciples. Qui est donc celuy qui faict l'Euesque,
& se dit vicaire de Iesus Christ? lequel tant s'en
faut qu'il laue les pieds des pources, qu'il pro-
pose les siens à baiser, non seulement au peuple:
mais aux Empereurs, Rois & Princes, voire à
conculquer leur col, comme il fut fait à l'Em-
pereur Frederic Barberousse, abusant du passa-
ge de l'Escripture, & disant, Tu marcheras sur
l'aspic & basilic, & presseras de la plante de tes
pieds le lion & le dragon. Prendrons-nous dōc
vn tel diable pour vicaire de Iesus Christ? Non,
non: mais pour l'Antechrist, & fils aîné de Sa-
tan. Iesus Christ estant nostre Immanuel terre-
stre à employe le temps de ceste habitation au
soulagement des pources, voire luy qui n'auoit
ou reposer son chef s'estant fait tel pour nous
enrichir. Chacū fait en quels delices & mal'heu-
reuse vie ce meschant Antechrist se plaît, pillāt
& saccageant, sous couuerture de principauté
spirituelle, tous ceux qui se soumettent à luy.
Iesus Christ apres faict le miracle de la resectiō
de tant de personnes au desert s'enfuit, sachant
que le peuple le vouloit faire Roy, & a declaré
deuāt le iuge terrien, que son Royaume n'estoit
de ce monde. L'Antechrist dit luy appartenir,
nō seulement vn Royaume: mais en signe qu'il
est Roy monarque, & qu'il peut confermer &

destituer tous potentats, il porte trois couron-
nes royales & imperiales: à ses dominations &
puissances, fortresses chasteaux & munitio^s, &
ce pendant n'aura point de hôte se faire succes-
seur de ce pource pescheur Simó Pierre, qui pour
tous biens n'auoit que la rets à pescher. Neant-
moins il faict & nome ses terres & possessions,
le patrimoine de saint Pierre, mais ou est ceste
chaire de saint Pierre qu'il celebre tant? ientés
la chaire à prescher. Qui est celuy d'entr'eux
qui y ait monté, qui en icelle aye parlé, & fust-il
vray que Pierre l'eust precedé? Iesus Christ s'est
soulmis à la puissance du Magistrat legitime, à
payé tribut pour sa personne, & commandé à
tous qu'ainsi fust fait. Ce menteur & faux succes-
seur, ne se contente de s'en exépter cōtre la pa-
role de Dieu: mais donne toute immunité à ses
complices, & à ceux qui conuienét avec luy en
son iniquité. Iesus Christ a appelé en sa compa-
gnie douze pources Apostres: mais la prudence
diabolique de ce vicaire sans charge, ne se con-
tente de ses richesses Maudites, mais il assem-
ble de tous pays les plus riches, pour estre de ses
disciples, qu'il appelle Cardinaux. Iesus Christ
ne laissoit ses disciples oisifs, mais les enuoyoit à
l'œuvre du Pere celeste. Les Cardinaux & Euef-
ques, sont enuoyez à la cuisine, & à toute disso-
lution. Iesus Christ s'est armé, & les siens qui luy
ont succédé pour annoncer la gloire de Dieu,
du glaive de l'Esprit, & n'a cōtraint personne,
que par la puissance de la Parole à le suyure: cest
Antechrist par armes, trahisons, larrecins, vené-

fices, par fer & feu, retient sa puissance & au-
thorité. Iesus Christ à porté sa croix, la couron-
ne d'espines, a racheté nostre vie par sa mort:
qu'a fait de semblable cest Antechrist, si ce n'est
de commouoir toute la Chrestienté en armes
& guerres, pour son proffit? Quant à la doctrine
Iesus Christ dit qu'il est venu pour accomplir
la Loy & volonté de Dieu son Pere, & nō pour
la dissoudre; à fin qu'on cognoisse, qu'il est vn
avec Dieu son Pere, & qu'il n'y a point de mul-
tiplicité de dieux. L'Antechrist monstre & en-
seigne pluralité de dieux, fabrique idoles &
images, ausquelles il veut inuocations & ado-
rations estre faites. Il enrichit d'or & d'argent
les corps morts, infets & puants, donne plu-
sieurs mediateurs & patrons, & comme parle
l'Escripture plusieurs Baalims. Iesus Christ des-
féd à ses Apostres, n'auoir n'exercer aucune puis-
sance mondaine. Et ne veut qu'ils regnent com-
me les Princes de ce mode, & qu'ils ayēt domi-
nation sur les ouailes du Seigneur: combien
cela est opposite au gouuernement de l'Ante-
christ, chacū le fait. Iesus Christ nous instruit par
sa Parole la forme de penitence, pour nous re-
tourner à Dieu par son intercession. Ce diable
encharné, prescrit vne formalité meschante
& mescognue en l'Escripture, de souffler en l'o-
reille d'vn prestre, pour chercher remission des
pechez. De là est sortie ceste fourmilierie de pre-
streries & moyneries, principalemēt de ces hy-
pocrites mendians. Iesus Christ à donné liberté
d'yser de toutes bonnes creatures, en sobriété.

avec action de graces : donne pour remede de l'infirmité des hommes le sainct mariage ce mechant Antechrist à tout corrompu, distingué iours & viandes, ce pendant il permet toutes yurongneries & dissolutions, deffend à tels qu'il luy a pleu, le sainct mariage, que le sainct Esprit à nommé honorable, & couche sans macule, voire à toutes personnes qui n'ont la grace speciale de continence. Sainct Paul veut que les Euesques & Diacres soyent mariez, l'Antechrist pour leur ouurir le moyen de toute paillardise, voire contre nature, veut qu'ils soyent celibes : c'est à dire sans propres femmes, mais qu'ils ayent tant de paillardes qu'ils voudront, & à osé tellement blasphemer contre le sainct Esprit, qu'il a dit, que l'homme marié, vit en chair, & qu'il ne peut plaire à Dieu. Et tels bougres, adulteres & mechans, viuront moins en la chair que ne feront ceux qui par le cōmandement de Dieu vsent du remede qui leur est donné, pour euter continence? Iesus Christ ne permet dissolution du Mariage qu'à cause de fornication, l'Antechrist a trouué outre icelle dix-huit autres causes, pour dissoudre ce que Dieu veut estre conioint, & pour ce faire à forgé des cognations spirituelles, par lesquelles il annulle & dissout les mariages, voire des plus grands Princes, choses horribles & espouantables: & ce pendant les Rois & les Princes soustiennent sa tyrannie. Et pour ne tirer cest article plus auant, qui est de foy par trop manifeste, il adorera ceste idole qui voudra, les enfans de Dieu, la detestent, &

ses traditions. Luy baise le pied, le deuant & derriere qui voudra, les enfans de Dieu le tiennent pour vn Antechrist & meschant, enfant du diable, que Dieu confondra par l'Esprit de sa bouche, comme en parient Isae, & saint Paul, & le temps en est pres : de sorte que ce piteux Dieu podagre qui est à present sur le siege d'impieté, ne fait où il en est, non plus que les Cardinaux qui sont avec luy, & sentent bien leur condamnation prochaine, & cognoissent leur mal-heur, duquel ils ne se peuuent desuelopper. Ne pensez donc point, Madame, de cōtraindre les subiets du Roy à telle miserable captiuité, d'estre sous le ioug de l'Antechrist, de ses loix & traditions, deliurez-vous de luy, & de ses liens, & le Roy aussi, & prenez exemple à tant de Rois & puissans Seigneurs, & à vos sages subiets qui vous en monstrent le chemin.

Oyez & entendez le Prophete Elie, qui parle à vous, Madame, haut & clair, comme il fit iadis au peuple d'Israel du temps d'Achab leur Roy, Iusques à quand clocherez-vous de deux costez? Si le Seigneur est Dieu, fuyuez-le, si c'est Baal, ou les patrons que les hommes par leur temerité: se forgent, fuyuez-les, & n'enveloppez point Iesus Christ avec Baal, la lumiere avec les tenebres: vous ne pouuez boire la coupe du Seigneur, & la coupe des diables: vous ne pouuez estre participante de la table du Seigneur, & de la table des diables. Voulez-vous prouoquer l'ire du Seigneur, où si vous vous estimez plus forte que luy? C'est ainsi que parle

sainct Paul, à fin que ne pensiez qu'il y ait quelque chose du mien. Voudriez-vous, Madame, que le diable tint son empire par ignorance de Dieu, par idolatries & superstitions, sur les subiets du Roy? Si l'ordonnez ainsi, leur recours sera à pleurs, gemissemens, continuelles prieres & oraisons: & sous ce fardeau, & au milieu de leurs afflictions, ils diront comme les pources enfans de Dieu sous Antiochus, Mourons puis qu'il plaist à Dieu: le ciel & la terre seront témoins que ce sera iniustement. Nous aurons donc deuant nos yeux l'aspect des temples des idoles, & ferons priuez de la ioye de la publique inuocation de nostre Dieu viuant & eternal, cōme nos peres ont eu le temple de Pheor, en la terre de Seon Roy des Amorriens, pour n'auoir droictement serui & honoré leur Dieu. Vos pources subiets, Madame, appliqueront ceste medecine à leurs fautes, & qu'ils ne sont pas dignes de voir que tout le Royaume soie reformé, & qu'il y ait vn accord & vne melodie en la religion, & que Dieu y soit purement serui & honoré par tout. Ce pendant ils auront paix avec Dieu, & en leurs consciences: combien qu'ils seront enuironnez de leurs ennemis, comme de mouches guespes qui leur viédront creuer les yeux, ce qu'ils endureront en toute patience & esperance. Et s'ils sont dechassez, & que l'Euangile soit banni de tout le Royaume (que Dieu ne vueille) encores y aura-il des villes de refuge. Si ce n'est en France, ce sera ailleurs, voire iusques entre les Turks, qui les re-

ceuront plus amiablement, que ne font vos officiers, spécialement de Paris. Ils ne craindront de s'en partir en nudité & mendicité, pour en liberté de conscience seruir & adorer nostre Dieu, secouant la poudre de leurs pieds en tesmoignage de la perdition de ceux qui les reiettent. Ce pendant vous pouues certainement attendre d'estre tiree en conte deuant Dieu, iuste, & rendrez raison de telles oppressiōs. Et ne serez excusee pour ne les auoir commandees ou faites: car il vous est commandé le prohiber. La verité de la parole de Dieu condamne celuy qui prent vne charge, laquelle il ne veut fidellement executer, s'il ne peult il faut qu'il la quitte. Ceux qui sont greuez & affligez, s'attendēt, à la verité & certitude de sa Parole, qu'il rédra affliction à ceux qui affligent, & aux affligez repos, en ceste iournee la que nostre Seigneur Iesus se manifestera du ciel, avec les Anges de sa puissance, & en flamme de feu, faisant vengeance contre ceux qui ne cognoissent point Dieu, & qui n'obeissent point à l'Euangile de nostre Seigneur Iesus Christ, lesquels seront en perditioneternelle, deuant la face du Seigneur.

Ne doutez donc, Madame, puis que Dieu l'a ainsi prononcé par l'organe de saint Paul, escriuant aux Theſsaloniciens, qu'il ne maintienne, & son arrest, & son droit, & qu'il ne voudra souffrir que sa Maieſté soit foulée aux pieds, par les hommes. Par ce moyen conioignant sa gloire, avec nostre salut, par vn lien inseparable, nous rend certains & asseurez, que quel-

que chose que les hommes entreprennent, que
nostre Seigneur Iesus Christ viendra pour nous
donner relasche & repos, & garentira son hon-
neur de l'orgueil & rebellion des hommes. Et
comme il ne peut mettre sa gloire en oubli, au-
si ne peut-il nostre salut. Et fera que les enne-
mis de sa verité, par son iuste iugement, soustien-
dront leur punition, deuant la face de sa Maie-
sté, qui sera d'autant horrible, qu'il faudra que
Dieu desploye sa vertu, contre eux. Voila les
les iugemens merueilleux de Dieu, auxquels
il faut que toute la terre tremble. Et nous con-
uient recognoistre que non seulement les blas-
phemeurs & contépteurs publiques de Dieu,
sont tenus pour ses ennemis: mais tous ceux
qui ne croient de cœur à l'Euangile, qui n'ap-
portent vne affection bonne & sainte à sa Pa-
role, qui ne l'ont imprimée en leurs cœurs, qui
ne prennent goust avec reuerence à icelle: ceux-
là (di-je) sont ennemis de Dieu, contre lesquels
l'ire de Dieu tombera, & en fin foudroyera sur
eux. Et partant l'Escripture admoneste d'ouir sa
Parole, & ne s'endurcir point, & d'apprendre
de ne venir hurter des cornes, contre les mena-
ces, & promesses qu'il a faites à ses enfans, &
qu'on ne luy face guerre mortelle par rebel-
lion, sachant que toute incredulité est rebellion
contre Dieu, comme toute obeissance commen-
ce par Foy.

Pour telles obstinations contre l'expresse vo-
lonté de Dieu: le Tout-puissant à bon droit
desploye son ire & courroux, & repend les fioles
de

son indignation contre ceux qui luy font teste
par diuers iugemens, tels & en tel temps qu'il
luy plaist l'ordonner, & par tels executeurs qu'il
veut, & bien souuent ceux dont on se doute le
moins. Il chastia Maacha, fille d'Absalon, femme
de Roboam, mere d'Abiam Roy de Iuda, par
Afa Roy de Iuda, petit fils de ladite Maacha,
comme il est escrit es Croniques des Rois. En
quoy se monstre vne instruction merueilleuse
de nous contenir sous la reigle & obeissance de
nostre Dieu, d'autant que c'est chose horrible de
cheoir es mains de Dieu viuant: mesmement à
ceux qui n'ont horreur non seulement de rece-
voir l'idolatrie, mais de commander d'estre re-
ceue: & mettent le Fils de Dieu, sous leurs pieds,
& tiennent pour prophane le sang de l'alliance, &
font iniure à l'Esprit de grace.

Et si l'ignorance n'est point excusée au siege
iudicial de Dieu, que sera-ce de ceux qui ioi-
gnent à leur ignorance ceste mauuaise volonté,
sont auteurs & cause, de l'ignorance d'autrui?
Qui cachent & veulent faire esgarer la clef
de science. Comme sont tous ceux qui empe-
schent la predication de l'Euangile. Ne seront-
ils pas iugez doubles ennemis de Dieu? Et si Ie-
sus Christ viendra pour destruire & confondre
ceux qui l'ont mescongneu, ne réplira-il pas d'ex-
reur & confusion ceux qui ont prohibé le cours
de sa cognoissance, qui est le cours de l'Euāgile?
Car quelque fois ignorance peut proceder de
simplicité, toutesfois inexcusable: mais la pro-
hibition de la publication de l'honneur qui ap-

partient à Dieu, ne peut proceder que de certaine malice d'orgueil & d'ypocrisie, qui priuent l'homme de toute discretion, droicteure & vray iugement. Et c'est ainsi que saint Paul en parle, que Dieu met telles gens en sens reprouué, & les laisse croire à mensonges, puis qu'ils ferment les yeux à la Verité. Voila l'enuie que le diable porta à l'homme dès le commencement, le destournant de la certitude de la parole de Dieu, & luy supposant vne doctrine de mensonge, au lieu de celle que Dieu luy auoit prononcée. Et pour nous garder de tel abus, il n'y a autre remede que l'assidue predication de la parole de Dieu, nue & naïfue, telle que l'Esprit de Dieu a manifesté par escrit, en laquelle git nostre salut, & la vertu de Dieu, la pasture de nos ames : qui rend les hommes traittables & ployables à l'obeissance, de Dieu, des Rois & des Magistras, sans murmure ou aucun chagrin. Or si celuy qui prohibe la nourriture corporelle est iustement tenu pour meurtrier, à plus forte raison celuy qui prohibe la pasture de vie, d'autant que la vie de l'ame est plus necessaire & de plus d'importace que la vie corporelle, ce qui ne peut estre fait sans deshonneste mespris de sa maiesté & de sa volonté. Car il est sans doute, que Dieu veut estre cognu & reconnu de tous. Sauueur de tout le monde, par la redemption faite par Iesus Christ nostre Seigneur. Ceux-la donc combattent contre sa volonté, qui ferment la porte à la predication de l'Euāgile, lesquels se plaisent de viure en tenebres obscures, empeschent que

la Lumiere n'entre vers eux & aux autres, pour-
ce que la lumiere descoure leurs fautes, leurs
impietez & concupiscences mauuaises : qui fait
qu'ils cherchent les lieux obscurs & tenebreux,
& sont contens d'estre endormi en leurs pource-
tez, & croupir sur leurs lies. Et d'autant que
la predication de l'Euangile est inseparable-
ment conioincte avec la discipline & mortifi-
cation de ce viel Adam, qui assiduellement ac-
croist ses racines & domination es hommes char-
nels. C'est pourquoy l'Euangile & reforma-
tion de vie desplaissent à ceux qui ne se veu-
lent departir du boubier & de la fange. Au
contraire, ceux qui par obeissance de l'Euangile
& participation de ceste lumiere celeste morti-
fient les desirs de ce monde, ont leur couuersa-
tion au ciel par la puissance de la foy, & condui-
te du saint Esprit, vnis avec Iesus Christ en sa
gloire, lequel ils attendent en leur redemption:
non pas en infirmité de chair : & en condition
seruile, aneanty en foy-mesme, comme en par-
le S. Paul : mais ressuscité en la vertu de son S.
Esprit, ayant desployé & manifesté sa gloire, à
l'exaltation de ses enfans, & confusion de ses en-
nemis. Car il viendra en ce dernier iour, non con-
temtible, mais comme iuge souuerain, avec les
Anges de sa gloire : & lors ceux qui l'ont mespri-
sé, & sa parole, cognoistront à leurs despens ce-
luy qu'ils ont esguillonné. Ce ne sera plus ce ver-
de terre desfiguré, plein de playes & d'infirmité
de nostre chair, mais le verront en sa force, en
dignité & excellente, en gloire, en puissance &

vertu, exalte par dessus tout nom, auquel tout genoil ployera, & sera admirable en ses Saints, pour estre glorifié en iceux. Car ce sera pour eux qu'il viendra en flamme & feu, & ne seront effarouchés de ceste maiesté, qui sera lors luisante en luy comme flamme & feu. Et ainsi il sera admirable en iceux: car il resplendira en eux, estant faits participans de sa gloire, qui sera espandue sur eux, comme sur les membres de son corps. Ils seront transformez en la vie celeste dudit Seigneur Iesus. De laquelle gloire & splendeur seront priuez les obstinez & contempteurs de ceste gloire qui est empreinte en l'Euangile. Desquels parle le Prophete Amos en disant, Ne desirez point que le iour du Seigneur viene, il vous sera vn iour de frayeur & d'estonnement, non point de salut & de ioye, il sera vn iour de cruauté & confusion, d'obscurité & de tenebres. Alors (dit Salomon en sa sapience) le iuste se trouuera en assurance deuant la face de ceux quil'ont tormenté: lesquels troublez & effrayez souspirans d'angoisse, diront de ceux cy, Nous soulions rire, faifans d'eux prouerbes de deshonneur, nous estimions leur vie meschante, & leur mort infame: maintenant il nous apper qu'ils sont compris entre les enfans de Dieu: nous auons este bien deceus & esgarez du droit chemin. Le pareil est confirmé en l'Epistre aux Hebreux, des graces que Dieu fait aux membres de Iesus Christ affligez de toutes pars: mais fin est, qu'en patience ils ont clos les gueules des lions, ils ont esteint l'ardeur du feu: au-

tres esprouuez par toutes afflictions, desquels le monde n'estoit digne, lesquels ensemble viendront à perfection. Par ce que dessus, Madame, l'ayant bien repeté en vostre memoire, comme Dieu vous en fera la grace, ie vous laisse à penser que vous aura en fin profité (car il faut venir là, & assister à ce iugement de Dieu) de vous estre efforcee de bannir la lumiere de la verité de Dieu du Royaume de vostre fils : ou l'auoir dechassée des villes ou des temples, ou l'auoir limtee de barrieres, ou restrainte en certains lieux, par Balliages & Seneschaussées, voire es granges & estables, comme prophane & indigne d'estre publiée ailleurs? Cela n'empeschera que l'esclair de la parole de Dieu n'apparoisse de l'Orient iusqu'à l'Occident : de la consistance & permanence de laquelle le soleil & la lune qui subsistent par sa puissance, en sont tesmoins au ciel. Iesus Christ est nay en vne estable, est posé pouremét en la creiche, neantmoins son approbation est d'enhaut. L'estoille cōduit les Sages à la recognoissance de sa diuinité, qui le viennent adorer de loin pays. Herodes & toute Ierusalé sont troublez, mais les Anges du ciel en grande multitude s'en esiouissent, & l'annoncent en terre. Face le monde ce qu'il voudra, mais la parole de Dieu sera eternelle, & ne s'en passera rien d'icelle qui ne soit accompli. Et puis que nostre Dieu a donné & establi cest ordre, qu'il veut estre cognu par sa Parole, qui est sa verité, sa vertu & puissance: qui est l'homme mortel qui voudra corrompre l'ordre que le

Dieu viuant a establi, & nous oster les lunettes
& moyens par lesquels il nous a cōmandé veoir
sa grandeur & nostre salut par vn mesme moyē?
Voudrez vo^r dōc entreprēdre, Madame (voyez
à qui vous auez à faire) priuez les meilleurs &
plus obeissans seruiteurs & subiets du Roy de
ce don singulier que Dieu a donné à son Eglise?
Vous ne pouuez oster ce qui ne vient de vous
ny de tous les hommes de la terre. Dieu veut
multiplier son Eglise par fidele instruction, luy
ferez-vous teste, comme si vous auiez puissance
d'empescher le decret de son iugement? C'est cō
me si vous vouliez de vos deux mains clorre la
bouche de nostre Dieu, afin qu'il ne soit ouy, &
& toutesfois il veut estre ouy, & le sera: il est
assez fort pour se donner audience. Assemblez
toutes vos forces, & empeschez si vous pouuez
que la voix de Dieu tonnant sur les montaignes
& sur les eaux ne soit ouye: prohibez ses foudres
& esclairs qu'ils ne soyēt veus, qui ne sont créez
que de nature, ayans prins commencement, &
prendront fin. Et si vous ne le pouuez, comment
pensez vous donner limites & bornes à la sapiē
ce de Dieu, à sa Parole eternelle? Vous estes du
tout abusée, & en grād erreur. Car nostre Dieu,
voire quād tous les subiets du Roy (comme il
ferōt) ny resisterōt aucunemēt, est suffisant pour
maintenir sa gloire sans moyēs & aides. Si Dieu
a peu cōseruer les liures de Moyse, Histoires, &
Propheties entre les mains des Iuifs, ennemis iu
rez de sa verité, lesquels il a maugré leur vouloir
constitué libraires de sa religion: si à son peuple

en la captiuité il a fuscité des Prophetes qui ont
executé leur charge, fera-il moins fort aujour-
d'huy pour l'entreenemēt de sa gloire, pour la-
quelle maintenir il peut faire soudre & fusciter
de dures pierres des enfans à Abraham, comme
prescha S. Iean au desert. Si lors que l'on reprint
les Apostres magnifians les louanges de Iesus
Christ, il a respōdu que s'ils se taisent, plustost les
pierres parlerōt: que sa gloire & verité soit teue:
qui pourra faire cesser & supprimer ceste cōstan-
te & permanēte sapiēce que Dieu veut q. prene
racine aux cœurs des hōmes qu'il a esleus pour
siens, auāt que fussent establis les fondemens de
la terre? Partant, Madame, tenez mesure, & ne
vous aheurtez cōtre la puissance de Dieu. Salo-
mon cōbien quil eust cōmandement de Dieu de
luy bastir son temple: encore a-il bien entendu
qu'il ne le pouuoit enclorre en iceluy, & estre re-
tenu es lieux faits de main d'hōmes, cōme dist S.
Paul aux Atheniens. Et vous, Madame, & vostre
cōseil mal instruit, luy dōnerez vous limites, bar-
res & estēdues, hors desq̄lles il ne se pourra trou-
uer, luy qui est d'essence, nature, & puissance infi-
nie? Cest folie. Il a le ciel pour son siege: toute la
terre, & nō point portion d'icelle, est la scabelle
de ses pieds, où il se fera paroistre, & en toute
part d'icelle qu'il luy plaira: & tous les hommes
du mōde qui ne sont que vers rāpans sur terre à
son esgard, le peuuēt ils prohiber? C'est luy (dit
Isaie) qui a mesuré les eaux avec son poing, & a
compasé les cieux avec la paume, a com-
pris la poudre de la terre avec trois adoigts, qui

a pesé au crochet les montagnes. Il sied sur la rō-
deur de la terre, & les hommes luy sont comme
vne goutte d'un seau; comme un grain en la ba-
lance. Il reduit les princes a rien, comme s'ils
n'eussent esté plantez ne semez, comme si leur
tronc n'eust point prins de racine. Qui empes-
chera qu'il ne paisce son troupeau comme le ber-
ger? Le Seigneur est eternal, il viendra en force
& puissance. La posterité d'Aaron, Sacrifica-
teurs & expositeurs de la Loy, bien qu'elle fist
un chef en la maison de Iacob: neantmoins afin
qu'ils fissent assiduellement leur charge, & qu'ils
ne fussent enveloppez de leurs particulieres ne-
gociations, furent priez de leur part contingente, &
leur part appliquer à la maison de Ioseph, au lieu
de laquelle ils ont eu les decimes de tous leurs
coheritiers. Et partant furent dispersez par tout,
afin qu'il n'y eust anglet en la terre où Dieu n'-
eust ses messagers & procureurs, pour retenir
le peuple en bride, & pour vacquer à la doctrine,
& qu'ils fussent aisément enquis de la doctrine
& exposition de la Loy. Qui nous sert d'un e-
xemple, que comme Dieu a voulu que ses Le-
uites fussent dispersez par tout, aussi veut-il à
present sa parole estre publiée par tout, qu'elle
soit preschee à toute creature, & en tous lieux.
Voyez donc, Madame, quelle est vostre ordon-
nance, & si elle est cōforme ou desrogāte à la pa-
role du Seigneur. Cōsiderez que cōbien que les
hōmes soyēt creéz en telle cōstitutiō de corps,
qu'ils doiuent dresser les yeux pour contēpler les
œuvres de Dieu, d'autāt qu'ils sont ordōnez spe-
ctateurs

Etateurs d'icelles: & q̃ tout le mōde leur est dres-
sé comme vn eschaffaut à cest effet: neantmoins
le principal est d'auoir les oreilles dressées, do-
ciles, & attentiuës à ceste parole de reconcil-
iation, de laquelle procede la foy. Et puis quil
nous est com mandé par voix, non pas humai-
ne, mais diuine, procedāte du ciel, d'ouyr Iesus
Christ en sa doctrine, cest vne grande temerité
attenter de vouloir fermer son eschole. Mes-
mement quil est dit & prononcé par leS. Esprit,
que celuy que n'orra ce Prophete sera extermi-
né du peuple de Dieu. Et nous ayant donné ce
moyē pour cognoistre sa volonte & clarté de sa
gloire, qui nous feroit vn labyrinthe inaccessi-
ble sans ladresse de sa Parole, ne le contēns pas.
Ie di ne Rois ne peuples, ne superieurs ne sub-
iets: car le commandemēt est à vn chacun sans
exception: l'vn ne fera exēpt de lire du Seigneur
pour l'autre. Ayant ce grand Roy Salomon par
son ingratitude diuertī son cœur de la sapien-
ce que Dieu luy auoit dōnée en toute idolatrie:
luy qui seul auoit eu la fruition de la grandeur
& splendeur du royaume d'Israel, fut chastié de
ses fautes par la diuision de son Regne, differee
au temps de Roboam son fils, & les dix pars
données a son seruiteur Ieroboam: lesquels cha-
cun en leur endroit seduīrent le peuple, en ido-
latrie: Mais le peuple pour la puissance & au-
thorité de leurs Rois ne fut excusé de sa faute
enuers Dieu, pour auoir contre son comman-
dement serui aux idoles que leurs Rois auoyent
establies. Pourtant le Seigneur Dieu pronon-

ce par ses Prophetes Ahias & Semeia, à chacun des Rois & à leurs peuples sa malediction, assauior à Ieroboam, de balier iusques au dernier de sa maison, comme on balie la fiente, tant que tout soit osté. Et dit au peuple qui luy auoit en cest endroit obey, qu'il frappera Israel, ainsi que le roseau qui est agité en l'eau, & desfrochera Israel de dessus la bonne terre qu'il auoit donnee a leurs peres. Et dit le Prophete à Roboam & à ses subiets, Vous auez delaisé le Seigneur, & il vous delaissera, & cognoistrez que cest de seruir à Dieu ou aux princes de la terre. Bien s'abusent donc ceux qui s'estiment asseurez en leurs consciences de suyure telle religion que leurs Rois ou magistrats veulent prescrire contre la volonté de Dieu: car ils tirent en perdition leurs subiets, comme l'aveugle conduisant vn autre aveugle, tombent tous deux en la fosse, & l'vn n'est exempt de malediction, pour l'autre. Ce pendant le peuple n'est desporueu de moyen, d'endurer plustost mille morts que de flechir aucunement ou s'absenter comme firent les Leuites d'Israel du temps de Ieroboam, plustost que de cōsentir a l'inuersion du legitime seruice de Dieu. Je fauroye volontiers des sages qui vous conseillent, à qui appartiennent les temples desquels vous chassez la predication de la parole de Dieu. Je croy qu'ils ne desmieront pas que l'vsage appartient au public, & qu'ils ont esté bastis par les peres & predecesseurs tant d'vne religion que de le l'autre & confesseront

que ce qui est commun, appartient à chacun particulier. Aussi ce qui est nostre, sans nostre consentement ne nous peut estre iustement osté. Puis donc que les temples ont esté bastis des deniers communs, pour seruir a l'usage commun: si la plus part du commun est reduit à l'Euangile quelle raison peut faire qu'ils soyent priuez de l'usage de leurs temples? Bien plus prudemment ont ordonné les estats de France, quand ils ont dit qu'il y auroit distribution de temples à chacune desdites religions, & pour l'exercice d'icelles. Autrement c'est faire vne iniustice trop apparente. Et voila, d'où sont sortis les demolitions & ruines des tēples, que nous ne pouuons approuer: mais l'occasion est procedee pour l'iniustice que l'on fait aux fideles, de les priuier de la commodité de partie desdits temples. C'est comme si vous voliez disposer de l'eau d'un fleueue, & ordonner qu'une partie du peuple en pourroit vser, & l'autre non. D'où vient ceste inégalité? les fideles subiets du Roy, plein de pieté, d'amour & de crainte de Dieu, sont-ils moins subiets du Roy que ceux qui sont idolatres & remplis de superstition?

Madame, receuez ceste admonition par laquelle ie vous anonice le iugement de Dieu, son ire & sa fureur, si vous continuez de vous bander contre la pure predication de sa Parole: Neantmoins nous ne potuons conseiller à vos subiets pour cela auoir autre recours qu'à Dieu par saintes prieres & oraisons, comme a esté dit ci dessus. Et ou ne leur sera permis vser de

ceste benediction & pasture celeste, qu'ils abandonnēt le pays, & cherchent lieux tels que Dieu leur donnera, en toute patience & simplicité, attendant ce qu'il plaira à Dieu d'ordonner.

Finalemēt, Madame, le vous supplie estre vraye & fidele tutrice du Roy vostre fils, conseruer sa ieunesse en integrité, au milieu des delices dangereuses & glissantes pollutions de la Cour, & mauuais exemples qui y sont. Vous sauez quel a esté le regne du Roy Francois le grand, avec la petite bande qu'il souloit ainsi nommer: combien a esté plein de lubricité celui du Roy Henry, que le pere auoit mis à la conduite d'une femme, qui a peruersti & pere & fils, avec l'exēple pernicieux qu'ils ont laissé a leurs subiets, que ie vous rememore avec grād douleur, pour le regret que ie say qu'en portez. Mais a ce que les fautes du passé vous seruent de doctrine, pour vous rendre plus auiſee, que consideriez qu'il a pleu à Dieu vous auoir conseruée pour prendre la garde du Roy vostre fils. Ce qu'eust fait la Royne Claude enuers le Roy vostre mari son fils, si Dieu luy eust donné vie pour la conduite d'iceluy, comme il a fait à vous, Madame. Vous auez donc, Madame, expres commandement de Dieu, d'auoir soin estude & diligence à ce que ceux, quil vous a donnez en charge, menent vie honeste & chaste en toute pureté, sans turpitude & dissolution, soit de faict, de gestes, ou de paroles: autrement leur vie est infecte & puante deuant Dieu, quand il ny auroit que ceste ac-

coustumance de se plaire à ouir paroles vilaines, bien que selon les hommes ils n'en fussent repris: car la balance de Dieu est autre que la nostre. Tous dissolus, tous ceux qui ont les regards esgarez, pleins de conuoitise, sont tenus pour paillards deuant luy. Il n'est point Legisslateur terrien, il condamne nostre cœur & pensées, où il veut ses commandemens estre grauez. Il ne se contente point d'estre seruy à l'œil; mais penetre iusques a nos affections & ardeurs de nos concupiscences cachees. La doctrine de l'eschole de Dieu preschee par saint Paul aux Corinthiens, porte qu'ils se gardent purs & nets de corps & d'esprit. Donnez reigle à la maison du Roy, Madame (qui deust estre vn miroir de toute pudicité, vne maison sainte, vn temple de vertu) que chacun apprene de contenir son corps & esprit en toute sainteté & honnesté. Qu'on prene exemple à vous, à qui Dieu a fait ceste grace de luyre en la maison du Roy, comme vne lampe luisante en exemple à vn chacun. N'endurez qu'aucun de quelque qualité qu'il soit, presume à desbaucher le Roy. C'est vne ieune plante que Dieu a choisie pour fructifier en sa maison, vn temple dedié & consacré pour son domicile, vn petit Iosias venu à point comme a saison couenante pour restablir les ruines du passé, & qui est encores en son entier. Endurerez-vous, Madame, qu'empoisonneurs, soyent hommes ou femmes, le corrompent & seduissent, & luy facent perdre la grace que

Dieu luy a donnée, le sollicitent à mal, & l'induisent à faire l'amour, choisir vne maistresse, & en luy faire ouurir la porte a Satan? Ne sont ce pas autant de maquerelles? A ceste corruption tout le Royaume a interest, comme il attouche a tous subiets que le Roy soit conserué en toute pureté & integrité, & n'estre point mis au rouët, comme pretend de faire. Tels emprisonneurs sont dignes de mort, qui rauissent & tirent à perdition entant qu'à aux est, & ame & corps de vostre fils & Roy. A quoy pouruoyez d'heure, Madame: & vos adieure au nom de Dieu de ce faire, auant que le mal prenne son pli, dechassant d'aupres de luy toutes personnes qui luy proposent paroles dissolues. Et faites Madame, comme vous exhorte S. Paul, qu'aucune parole vileine & infame ne soit seulement nommée deuant luy, ainsi qu'il appartient estre fait entre les saincts. Soyent separees & distraites de luy toutes occasions induisantes à dissolution. A quoy ont iamais serui & seruent encores à present les salles a Bal, qui sont par toutes les maisons royales? Veoir es danses, femmes & filles honteusement descouuertes, que le Roy soit veautré en vne troupe de femmes? Qu'est cela que les preparatifs de paillardise, & les flammettes de Satan? Et que ce qu'en aura esté fait & dit par le Roy, on en fera des contes pour rire. Quel rire? quand le Roy est manifestement tiré à perdition. Et si Dieu nous condamne par sa doctrine à rendre conte de toute parole oisue,

cest à dire sans edification, que conte sera-il rendu de tant de paroles & gestes vileins & deshonestes? Vn Payen Poete a bien seu dire (dont saint Paul en a fait son poffit) Que la bonne vie est corrompue par paroles dissoluës. Et les Chrestiens ne le voyent & ne le confessent, & diront qu'ils n'ont point intention mauuaise, qui est appertement desmentir l'Esprit de Dieu. Voulez-vous, Madame, que ie mette le doigt dessus? vous sauez ou deuez sauoir, car ce n'est chose cachée, la damoyelle qui est sur les rangs, qui a ia fait preuue de son incontinence, & ne fustce qu'aux vestemens de dueil qu'elle a n'aguères porté pour les decez de celui qu'elle auoit infatué, le plus grand qui fust à la fuytte du Roy. Il y en a peut estre torp d'autres. Vo⁹ me pardōnerez si l'Esprit de Dieu me contraint de vous dire que telles meschantes & puantes font grand tort & à vostre vertu & probité, & aux palais & maisons royales. Et ny a moyé de reparer ceste faute que par vn dechassement honteux de telles personnes, à la veue d'vn chacū, afin qu'il ne leur aduiēne de corrompre le Roy, auāt q̄ par nature il ait senty les aiguillons de la chair, en taschant à luy faire recevoir en son corps les fructs de peché, mais fructs procreez & hastifs auāt sa saison. Bien peut aduenir, cōme dit la loy ciuile, qu'es maisons des personnes hōnestes s'y cōmettra quelque vilenie auāt qu'ils en soyent aduertis: mais aux maisons sacrees des Rois & Roines la moindre suspitiō doit estre suffisante cause pour

de chasser telle ordure. Enquerez-vous, il vous
touche de le sauoir, & d'y pouruoir: & pre-
sentement qu'estes en viduité, moins empeschée
es choses terriennes, pour plus a plein & viue-
ment vous adonner aux choses spirituelles, &
que le Roy est en bas aage: tellemēt neantmoins
qu'il est hors du gouuernement de femmes, &
n'est en aage de mariage. Il seroit bien feant (Ma-
dame) vous contenter d'un petit train de fem-
mes & filles, & fussent toutes mariees, au guet
& conduite de leurs maris, qui ne passassent &
repassassent parmy les hommes, pour le moins
qu'elles fussent publiquement couuertes. Ici
seroit bien à propos représenter deuant vos
yeux plusieurs exemples de tant de louables &
vertueuses dames & Roines: & l'office recom-
mandable qu'elles ont fait aux Rois en bas aage
leurs enfans: mais pour n'estendre cest article en
longueur, il suffira cestuy qui est plus propre,
& attouche de plus pres au Roy & à vous, Ma-
dame. Le Roy Loys huitieme eust pour femme,
Blanche fille du Roy de Castille, & niepce du
Roy Iean d'Angleterre: avec la prudence & ver-
tu dōt Dieu la doua & decora grandement, elle
fust femme feconde & des plus agreables qui
fust onques au peuple en la conduite du Royau-
me & de ses enfans, conuenant à la grandeur de
sa maison. Elle auoit esté regente en France,
le Roy son mari viuant, estant en l'expedition
de la guerre, hors du Royaume, comme il vous
est adueni, le roy vostre mari estant en l'exp-
dition de la guerre par luy faite es Allemagnes,
& re

& recouurement des villes de Mets, Thou & Verdum : conformant ceste histoire à vostre temps, estant le Roy Loys apres son retour peu apres decedé delaiſſa le Roy Loys neuſiesme ſurnommé ſainct Loys en bas aage : mineur de quatorze ans, fut ceste notable & vertueuſe, Dame par deliberation generale des eſtats de France eſtablie gouuernante, non ſeulement du Roy & ſes freres mais du Royaume, comme Dieu a voulu eſtre fait en vostre endroit ſoubs le bas aage du Roy Charles neuſieme vostre ſils, en conformité & conuenance pareille. Mais voici comme il pleut à Dieu eſtendre lors ſa benediction, ſur ce ieune Roy. La Roine Blanche ſa mere, combien que ſa prudence fut par tout grandement eſtimee, ne voulut d'elle meſme executer ceste grande charge, mais appella en ſon conſeil les plus experimentez, & vertueux cheualiers du Royaume, & deſquels le Roy pouuoit receuoir exemples dignes de luy, afin que ce ieune Roy fuſt principalement inſtruit en la crainte & reuerence de Dieu, à quoy elle tenoit la main, & ne ſ'en fioit qu'à elle de ce que appartenoit aux meurs & diſcipline du Roy ſon ſils qu'elle ne veiſt & entendit tout ce que ce faiſoit en ſa preſence. Et bien que le commencement du regne de ſon ſils fuſt troublé par pluſieurs emotions & factions de ceux qui abuſoyent de ſon ieune aage meſmement pour la querelle de ceux de Lorraine, neantmoins Dieu l'aida tellement que par ſa prudence le tout fut eſteint à ſon grand honneur. Le pareil


vous est aduenü par la mesme maison, comme il a esté ci dessus amplement deduit. Il s'esmeut aussi lors à cause de la religion grande querelle contre le conte de Tholose, mesmement à cause de la rebellion de la ville d'Auignon qui estoit des appartenances du conte de Prouence, qui fut remise en son obeissance que depuis les Pappes sans titre se sont appliqués avec le conte de Venisse, qui estoit le vray patrimoine des contes de Tholose. Et ne profitta toute ceste querelle de la religion, qu'au Pape qui fait faire son profit par tout, sous le pretexte de ceste fausse donation de L'empereur Constantin, dont ils ont longuement, abusé le monde. Tant qu'il ait pleu a Dieu, deniaiser les princes, & cognoistre les abus des Papes, qui se descouurent tousiours de plus en plus. Ceci vous donne aduertissement de vous resentir de ceste proye & remettre au domaine du Roy non seulement ceste ville d'Auignon qui luy appartient mais aussi le conte de Venisse heritage des contes de Tholose, anciens vassaux des Rois predecesseurs du Roy vostre fils, mesmemēt à present que le peuple vousrequiert aide pour se desueloper de la seruitude & tyrannie de ce Pharaon cruel tyran des consciences des homes, & qui a biē osé passer & mer & montaignes pour prendre les appartenance de la couronne. Ne soyez froide & negligēte à receuoir & accepter leurs requestes, & benedictiōs que Dieu vous offre par leur moyē. Et si vous n'aues trouué mauuais le recouremēt q̄ le feu Roy vo


estre mari a fait des villes de Callais & Guynes,
auec toute la terre Doye apres le long temps
qu'elles auoyēt esté occupees par force de guer
re par les Anglois, non obstant tant de con
tracts interuenus, quelle difficulté ferez-vous
au recouurement du propre heritage du Roy
qui luy a esté rai par tromperies & deceptiōs,
& sans cause apprenté que d'ypocrisie & fausse
religion. Chassez à toute force vn tel loup d'au
pres des frōtieres du royaume, & maintenez les
anciens limites d'iceluy contre vn tel volleur,
& sentirez en peu de temps, quel proffit vous
aura apporté vn tel iuste & legitime accroisse
ment. A pareille raison le roy d'Angleterre s'est
deuelopé de la pēsion que ses predecesseurs, sou
loyent payer à ce mesme imposteur.

Et retournant d'ou nous sommes nagueres
departis, ie vous ay ici exhibé, Madame, le mi
roir digne de toute admiration de l'excellen
te Roine Blanche, & vous ay monstté combien
Dieu vous a fait de grace, de vous approcher
d'elle en conformité de toutes actions, afin que
ce qui en defaut l'accomplissez principalement
pour lobeissance que deuez à Dieu, aussi à son
imitation & exemple. Et ne mettés en oubli
les sainctes admonitions quelle faisoit au Roy
son fils, entre lesquelles estoit ceste principale,
Qu'il eust en horreur d'offenser Dieu, & con
treuenir a ses saints commandemens, & n'y
eust il autre cause que tel desordre, desplaist, à
Dieu a qui toute obeyssance doit estre ren
due. Et tant de fois luy repetoit, Mon fils, que


vous est-ce d'estre Roy, voire monarque de tout le monde si, la fin de vostre vie vous conduit à damnation eternelle? Et combien que ce temps fust par trop corrompu, non tant toutesfois qu'est le nostre neantmoins ceste bonne & sainte Dame sauoit tresbien luy imprimer, par frequentes admonitions ne se destourner de lobeissance de Dieu ne sadonner a femmes, & se contenter de celle que Dieu avec le temps luy donneroit. Luy proposoit les Royaumes & republiques qui auoyent esté maudites de Dieu pour les adulteres, & vie dissoluë de leurs rois: aussi quil se proposast que les enfers estoient establis generalement pour tous hommes, quelques grans qu'ils feussent, qui contemnoient lobeissance qu'ils deuoyent à Dieu, De les documens il y en a des liures express, qui ne vous peuent estre cachez, afin qu'ayes de quoy respondre aux moqueurs de la dite Cour qui trouueront estrange que le Roy vostre fils soit par vous instruit à se conformer à lobeissance de Dieu par ce bon exemple: & qu'il cognoisse d'heure que ce grand Dieu demande estre seruy & honoré de ceux qu'il a commis par dessus les peuples, & les a ceints du baudrier de grandeur des principautez, & qu'il est terrible à ceux qui mescognoissent tenir de luy cest honneur. Le tout est qu'il vous plaise veilles sur les mœurs du Roy, qu'il n'y ait rien qui empesche que Dieu ne continue sa benediction sur luy, & sur sa ieunesse, & qu'elle soit gardee sans macule deuant la face de no-


stre Dieu. Vous sauez l'exemple de Salomon,
Dieu doit mieux au Roy, & à vous, Mada-
me, bonne veuë & prudente conduite du
Roy, & vous face la grace de separer de luy
tout mal, & vous maintienne en sa sainte gar-
de & protection & apres ce regne temporel.
vous donner son royaume en toute eternité
perdurable. De Rome ce deuxieme de Iuin mil
cinq sens soixante trois. Et au dessous de l'ori-
ginal est escript. De vostre maiesté tref-humble
seruiteur Gio Marco Bruccio.












82


THE
NEWBERRY
LIBRARY

301.

